

朝 歷

部 說 種 五 十 三

觀 大 部 百 一

古今說海

明雲間陸氏原編

集成圖書公司印行

集 未



編 二 第 畧 說



上海图书馆藏书



A541 212 0017 0134B

明
靈
閩
陸
氏
原
編

說
略

集
成
圖
書
公
司
印



宣統元年冬季
第二次印於上海

欽定四庫全書提要

鐵圍山叢談六卷

宋蔡條撰條字約之自號百衲居士興化仙遊人蔡京之季子也官至徽猷閣待制京敗流白州以死宋史附載京傳末稱宣和六年京再起領三省目昏眊不能視事悉決於條凡京所判皆條爲之且代京入奏由是恣爲姦利竊弄威柄宰臣白時中李邦彥惟奉行文書其罪蓋與京等曾敏行獨醒雜志則載條作西清詩話多稱引蘇黃諸人竟以崇尚元祐之學爲言者論列蓋雖盜權怙勢而知博風雅之名者陳振孫書錄解題稱西清詩話乃條使其客爲之殆以蔡攸領袖書局懵不知學爲物論所不歸故疑條所著作亦出假手然此書作於竄逐之後黨與解散誰與捉刀而敘述舊聞具有文采則謂之驕恣紈袴則可不能謂之不知書也書中稱高宗爲今上謝石相

字一條稱中原傾覆後二十一年爲紹興十七年徽宗買茴香一條稱中興歲戊辰爲紹興十八年又趙鼎亦卒於紹興十七年而此書記鼎卒後王趯坐調護鼎被劾罷官過白州見條之事是南渡後二十餘年尙謫居無恙亦可云倖逃顯戮矣條所作北征紀實二卷述伐燕之事陳振孫謂其歸罪童貫蔡攸爲蔡京文飾此書所敘京事亦往往如是如史稱京忠言者議已作御筆密進乞徽宗親書以降條則稱政和三四年上自攬權綱政歸九重皆以御筆從事史稱京由童貫以進又稱宦官宮妾合詞譽京條則稱京力遏宦官遏之不得更反折角史稱范祖禹劉安世皆因京遠竄條則謂京欲援復安世乃陳瓘而不能已則與祖禹子溫最相契其巧爲彌縫大抵類此惟於其兄攸無恕詞蓋以攸嘗劾條又請京殺條故也至於元祐黨籍不置一語詞氣之閒頗與其父異趣於三蘇尤極意推崇而丁仙

現一條乃深詆王安石新法則仍其西清詩話之旨也他如述九璽之源流元圭之形製九鼎之鑄造三館之建置大晟樂之宮律及徽宗五改年號之義公主初改帝嬴後改帝姬之故宣和書譜畫譜博古圖之緣起記所目覩皆較他書爲詳核以及辨禁中無六更之例宮花有三等之別俗諺包彈之始粵人雞卜之法諸葛氏筆張滋墨米芾研山大觀端研玻璃母龍涎香薔薇水沉水香合浦珠鎮庫帶藕絲鐙百衲琴建溪茶姚黃花諸條皆足以資考證廣異聞又如陳師道後山詩話稱蘇軾詞如教坊雷大使舞諸家引爲故實而不知雷爲何人觀此書乃知爲雷中慶宣和中以善舞隸教坊三經新義宋人皆稱王安石觀此書乃知惟周禮爲安石親筆詩書二經實出王雱又徽宗繪事世稱絕藝觀此書乃知皆畫院供奉代爲染寫非真自作尤歷來賞鑒家所未言其人雖不足道以其書論之亦說部

中之佳本矣文獻通考作五卷此本實六卷或通考爲傳寫之誤歟

古今說海

鐵圍山叢談

說略十一 雜記十二

太祖皇帝應天順人肇有四海受禪行八年矣當乾德之五祀而五星聚奎明大異常奎下當曲阜之墟也時太宗適爲兗海節度使則是太宗再受命之祥此所以國家傳祚聖系皆自太宗應符既同乎漢祖而卜年宜過於周歷矣

太宗始嗣位思有以帖服中外者一日輦下市肆有丐者不得乞因倚門大罵主人遜謝久不得解衆方擁門聚觀中忽一人躍出以刀刺丐者死遺其刀而去會日已暮追捕莫獲翌日聞奏太宗大怒謂猶仍五季亂習乃敢中都白晝殺人卽嚴索捕期必得有司懼罪久之迹其事乃主人不勝其憤而殺之耳獄具太宗喜曰卿能用心若是雖然第爲朕更一覆毋枉焉且攜其刀來不數日尹再登對以獄詞并刀上太宗問審乎曰審矣於是顧旁小內侍取吾鞘來小內侍惟命卽奉刀內鞘中因拂袖而起入曰如此甯不妄殺人

政和初間治極之際地不愛寶所在奏芝草者動三三萬本斬黃間至有一鋪二十

五里遍野而出汝海諸郡縣山石皆變瑪瑙動千百塊而致諸輦下伊陽太和山崩奏至上與魯公皆有慙色及復上奏山崩者出水晶也以木匣貯之進匣可五十斤而多至數十百匣來上又長沙益陽縣三溪流出生金重十餘斤後又出一塊至重四十九斤他多稱是

冠禮肇於古國初草昧未能行因循至政和始講焉是時淵聖皇帝猶未入儲宮也初以皇長子而行冠於是天子御文德殿百僚在位命官行三加禮是日方樂作行事而日爲之重輪也先是諸王冠止於宮中行世俗之禮謂之上頭而已繇是而後天子諸子咸冠於外庭蓋自淵聖始

開寶初車駕親征僞漢引汾水灌太原城時盛夏藝祖露臂跣足亦不裹頭手持刀坐黃蓋下督兵吏運土築堤以堰汾河城上望見矢石雨至不避也水浸城者餘數版而已又命水軍乘舟焚其譙門幾陷會班師獲免其後虜有使於僞漢者見水退而城始大圯乃笑曰南朝知壅水灌城之利且不知灌而決之則無太原矣

南俗尙鬼狄武襄青征儂智高時大兵始出桂林之南道旁有一大廟人謂其神甚

靈武襄遽爲駐節而禱之因祝曰勝負無以爲據乃取百錢自持之且與神約果大捷則投此期盡錢面也左右諫止儻不如意恐沮師武襄不聽萬衆方聳視已揮手倏一擲則百錢盡紅矣於是舉軍歡呼聲震林野武襄亦大喜顧左右取百釘來卽隨錢疎密布地而釘帖之加諸青紗籠覆手自封焉曰伺凱旋當謝神取錢其後破崑崙關敗智高平邕管及師還如言取錢與幕府士大夫共視之乃兩字錢也

陰陽家流窮五行術數不得爲亡至一切聽之反寒人事斯失矣是以古人行道而委命不敢用億中以爲信也先魯公生慶曆之丁亥其月當壬寅日當壬辰時爲辛亥在昔幼時言命者或不多取之能道位極人臣則不過三數及逢時遇主君臣相魚水而後操術者人人爭談格局之高推富貴之繇徒足發賢者之一笑耳大觀改元歲復丁亥東都順天門內有鄭氏者貨粉於市家頗贍給俗號鄭粉家偶以正月五日亥時生一子歲月日時適與魯公合於是其家大喜極意撫愛謂且必貴時人亦爲之傾聳長則恣其所欲爲鬪雞走犬一切不禁也始年十有八春末攜妓從浮浪人躍犬馬游金明自苑中歸上下悉大醉矣馬忽駭入波水中浸而死

昔江南李重光染帛多爲天水碧天水國姓也當是時藝祖方受命言天水碧者世謂逼迫之兆未幾王師果下建業及政和末復爲天水碧時爭龔慕江南風流吾獨惡之未幾犬戎寒盟豈亦逼迫之兆乎

龐丞相籍以使相判太原時司馬溫公適倅并州一日被檄巡邊溫公因便宜命諸將築堡於窮鄙而不以聞遂爲西羌敗我師破其堡殺一副將朝廷深訝龐公擅興詰責不已龐公旣素重溫公之賢終弗自言久之遂落使相以觀文殿學士罷歸龐公益默不語溫公遂獲免嗚呼龐公其真可上接古人千載之風矣

王舒公介甫熙甯末語叔父文正公曰天不生才且奈何孰可繼吾執國柄者乎乃舉手屈指曰獨兒子也蓋獨元澤因下一指又曰次賢也又下一指卽又曰賢兒如何謂魯公則又下一指沉吟者久之始曰吉甫如何且作一人遂更下一指則曰無矣是時元澤未病吉甫則已隙云

河中有姚氏十三世不析居矣遭逢累代旌表號義門姚家也一日大小死欲盡獨兄弟在方居憂而弟婦又卒弟獨與小兒同室處焉度百許日其家人忽聞弟室中

夜若與婦人語笑者兄弗信也因自往聽之審一日勵其弟曰吾家雖驟衰且世號義門吉弟縱喪偶甯不少待方衰經未除而召外婦人入舍中耶懼辱吾門將奈何弟因泣涕而言不然也夜所與言者乃亡婦爾兄瞠瞠詢其故則曰婦喪踰月卽夜叩門曰我念兒無乳至此因開門納之果亡婦遂徑登榻接取兒乳之弟甚懼自是數來相與語言大抵不異平時懼其怪而不敢駭兄也兄念家道死喪殆盡今手足獨有二人此是欲亡吾弟爾且弟計不忍絕然吾必殺之因夜持大刀伏於門左其弟弗知也果有排門而入者兄盡力以刀刺之其人大呼而去旦視之則流血塗地兄弟因共尋血蹤至於墓所則弟婦屍橫墓外傷而死矣會其婦家適至睹此而訟於官開墓則空棺耳官莫能治俄兄弟咸死獄中姚氏遂絕

任宗堯者字子高名家子仕至典樂後改服武弁終贈觀察使宗堯多藝能洞曉天官律呂蓋傳授於魏漢律先生宗堯始仕宦時卽喜功名大觀末從尙書王甯中書舍人張邦昌使高麗爲上節至四明則放洋而去不十日四明忽傳副使舶壞人爲痛之始宗堯將登舟則寄所齎玩好琴書於相識故人家而邁及是傳也其故人者

嗟惻一旦有女奴忽暴病不省遂爲宗堯音訴其故人曰某所以涉鯨波萬里本希尺寸賞不謂遽持千金之軀而葬於魚腹故人念乎某所寓三琴實平生愛賞甲可歸之我家乙亦奇古當奉故人下者可與某凡所寓篋笥中百物厯厯分區不遺毫髮其故人大駭爲奠哭久之女奴始甦翌日則四明一郡皆傳謂使者舟壞信矣其後使人自高麗歸上下一無恙故人者得見宗堯歡喜竊笑獨異於常宗堯始疑而詢焉方道其事乃知爲黠鬼所侮

雒陽大內興立自隋唐五代至聖朝藝祖嘗欲都之開寶末幸焉而宮中多見怪且適霖雨徒零祀謝見上帝而歸是後至宣和又爲年百五十久虛曠蓋自金鑾殿後雖白晝人不敢入入亦多有異蠶或大於斗蛇率爲巨蟒日夜絲竹歌哭之聲不絕也宣和未有監官吳本者武人恃氣不畏事夏月因納涼於殿廡間至晡時後天尙未昏黑而從者堅請歸舍不聽俄忽聞蹕聲自內而出卽有衛從繽紛執紅銷金籠燭者數十對成行羅列中一人衣黃人如帝王狀胸間尙帶鮮血擁從甚盛徐行由殿廡從本寓舍前過本與其從者急趨入戶避之得詳瞰焉最後有一衛士似怒本

納涼故妨其行從也乃以手兩指按其臥榻之四足遂穿磚而陷於地頃刻轉他殿而去遂忽不見本大駭自是不敢宿止其中矣因圖畫所見徧以示人雒陽士大夫多傳之曰此必唐昭宗也吾頃嘗聞是事第流落不偶久而十忘七八矣

劉器之安世元祐臣也晚在雖陽以鏹二十萬鬻一舊宅或謂此地素凶不可止器之不信始入卽有蛇虺三四出屋室間呼僕廝屏去則率拱立謂有鬼神不敢措手器之怒改命家人輩自納諸筐篋而棄諸汴流翌日則蛇出益多再棄輒復又倍曾不浹旬乃至日得五七篋不已也器之不樂因自焚香於土神祠前曰此舍某已用錢易之卽是某所居矣蛇安得據以爲怪乎始猶覲神之有職而令倏革今數日怪益出是神之不職爾固當受罰雖願仍其舊貫不可得矣顧從者盡搯土偶五六擲之河中召匠改塑由是怪不復作

王晉卿家舊寶徐處士碧檻蜀葵圖但二幅晉卿每歎闕其半也徽廟一旦訪得之乃從晉卿借半圖晉卿惟命但謂端邸愛而欲得其秘爾徽廟命匠者標軸成全圖招晉卿以觀因卷以贈一時盛傳人已悚異厥後禁中謂之就日圖者是已太上天

縱雅尙已著龍潛之時也及卽大位酷意訪求天下法書圖畫自崇甯始命宋喬年掌御前書畫喬年後罷去而繼以米芾輩至末年尙方所藏率舉千計實熙朝盛事也吾以宣和歲癸卯嘗得見其目若唐人用硬黃臨二王帖至三千八百餘幅顏魯公墨迹至八百餘幅歐虞褚薛及唐名臣李太白白樂天等書字不可勝會獨兩晉人則有數矣至二王破羌路神諸帖真奇絕蓋亦爲多焉又御府所祕古來丹青其最高遠者以曹不興玄女授黃帝兵符圖爲第一曹髦卞莊子刺虎圖第二謝雉烈女完節圖第三自餘始數顧陸僧繇而下不興者吳孫權時人曹髦乃高貴鄉公也謝雉亦晉人烈女謂綠珠實當時所筆又加顧長康則古賢圖戴逵破琴圖黃龍負舟圖皆神絕不可一二紀次則鄭法士展子虔有北齊後主幸晉陽宮圖文書法從圖之屬大率奇特甚至唐人圖牒已不足數然唐則度人經者乃褚河南書字而閻博陵繪其相類多有此於今無復茲睹矣每令人短氣蓋時旣好尙世因爲之貨賂亦爲時病此則良過矣

虞夏而降制器尙象後世由漢武帝汾陰得寶鼎因更其年元而宣帝於扶風亦得

鼎款識曰王命元臣官此物色及後和帝時竇憲勒燕然還南單于遺憲仲山甫古鼎有銘而憲遂上之凡此數者咸見諸史記所彰灼者殆魏晉六朝隋唐亦數數言獲古鼎器梁□之遴好古愛奇在荆楚聚古器數十百種又獻古器四種於東宮皆金錯字然在上者初不大以爲事獨國朝來浸乃珍重始則有劉原父侍讀爲之倡而成於歐陽文忠公又從而和之則若伯父君謨東坡數公云爾初原父號博雅有盛名曩時出守長安長安號多古簋敦鏡甗彝尊彝之屬因自著一書號先秦古器記而文忠公喜集往古石刻遂又著書名集古錄咸載原父所得古器銘款由是學士大夫雅多好之此風遂一煽矣元豐後又有文士李公麟者出公麟字伯時實善畫性希古則又取生平所得暨其聞睹者作爲圖狀說其所以而名之曰考古圖傳流至元符間太上皇卽位憲章古始眇然追唐虞之思因大崇尙及大觀初乃倣公麟之考古作宣和殿博古圖所藏者大小禮器則已五百有幾世旣知其所以貴愛故有得一器其直爲金錢數十萬後動至百萬不翅者於是天下塚墓破伐殆盡矣獨政和間爲最盛尙方所貯至六千餘數百器遂盡見三代典禮文章而讀先儒所講

說殆有可哂者始端州上宋成公之鍾而後得以作大晟及是又獲被諸制作於是聖朝郊廟禮樂一旦遂復古跨越先代嘗有旨以所藏列崇政殿暨兩廊召百官而宣示焉當是時天子尙畱心政治儲神穆清因從瑣闥密窺聽臣僚訪諸左右知其爲誰樂其博識味其議論喜於人物而百官弗覺也時所重者三代之器而已若秦漢間物非殊特蓋亦不收及宣和後則咸蒙貯錄且累數至萬餘若岐陽宣王之石鼓西蜀文翁禮殿之繪像凡所知名罔間巨細遠近悉索入九禁而宣和殿又創立保和殿者左右有稽古傳古尙古等諸閣咸以貯古玉印璽諸鼎彝禮器法書圖畫盡在然世事則益爛漫上志衰矣非復前日之敦尙考驗者俄遇僭亂側聞都邑方傾覆時所謂先王之制作古人之風烈悉入虜營夫以孔父子產之景行召公散季之文辭牛鼎象樽之規模龍馘鴈燈之典雅皆以食戎馬供爨烹腥鱗濕滅散落不存文武之道中國之恥莫甚乎此言之可爲於邑至於圖錄規模則班班尙在期流傳於不朽云作古器說

藝祖始受命久之陰計釋氏何神靈而患苦天下今我抑嘗之不然廢其教矣日且

暮則微行出徐入大相國寺將昏黑俄至一小院戶旁望見一髡大醉吐穢於道左右方惡罵不可聞藝祖陰怒適從旁過忽不覺爲醉髡攔胸腹抱定曰莫發惡心且夜矣懼有人害汝汝宜歸內可亟去也藝祖默心動以手加額而禮焉髡乃舍之去藝祖還內密召忠謹小璫爾行往某所覘此髡在否且以其所吐物狀來及至則已不見小璫獨爬取地上所吐狼籍至御前視之悉御香也釋氏教因不廢

宣和歲己亥夏都邑大水幾冒入城隅高至五七丈久之方得解時泗州僧伽大士忽見於大內明堂頂雲龍之上凝立空中風飄飄然吹衣爲動旁侍惠岸木叉皆在焉又有白衣巾裹跪於僧伽前者若受戒諭狀莫識何人也萬衆咸睹迨夕而沒白衣者疑爲龍神之徒爲僧伽所降伏之意爾上意甚不樂

宣和六年春正月甲子實上元節故事天子御樓觀燈則開封尹設次以彈壓於西觀下又於時從六宮於其上以觀天府之斷決者簾幕重密下無由知是日上偶獨在西觀上而宦者左右皆不從其下則萬衆忽有一人躍出縑布衣若僧寺童行狀以手指簾謂上曰汝是某邪有何神乃敢破壞吾教吾今語汝報將至矣吾猶不畏

汝汝豈能壞諸佛菩薩邪時上下聞此皆失措震恐捕於觀下上命中使傳呼天府亟治之且親臨其上則又曰吾豈逃汝乎吾故示汝以此使汝知無奈吾教何爾聽汝苦吾吾今不語矣於是箠掠亂下又加諸炮烙詢其誰何略不一言亦無痛楚狀上益憤復召行天法羽士曰宋沖妙世號宋法師者亦神奇至視之則奏曰臣所治者邪鬼此人者臣所不能識也因又斷其足筋俄施刀鬻血肉狼籍上大不怡爲罷一日之歡至暮終不得爲何人付獄盡之嗚呼浮圖實有人

桂林有韓生嗜酒自云有道術人初不大聽重之也一日欲自桂過明同行者二人俱止桂林郊外僧寺而韓生亦來夜不睡自抱一籃持匏杓出就庭下衆共往視之則見以杓酌取月光作傾瀉入籃狀爭戲之曰子何爲乎韓生曰今夕月色難得我懼他夕風雨儻夜黑畱此待緩急爾衆笑焉明日取視之則空籃弊杓如故衆益晒其妄及舟行至邵平共坐江亭上各命僕辦治殺膳多市酒期醉適會天大風俄日暮風益亟燈燭不得張坐上墨黑不辨眉目矣衆大悶一客忽念前夕事戲鸚韓生日子所貯月光今安在甯可用乎韓生爲撫掌而對曰我幾忘之微子不克發我意

卽狼狽走從舟中取籃杓而一揮則白光燦焉見於梁棟間如是連數十揮一坐遂盡如秋天晴夜月色激灑秋毫皆睹衆乃大呼痛飲達四鼓韓生者又酌取而收之籃夜乃黑如故始知韓生果異人也

奉宸庫者祖宗之珍藏也政和四年太上始自攬權綱不欲付諸臣下因踵藝祖故事檢察內諸司於是乘輿御馬而遍歷內中諸司大駭懼經數日而止因是併奉宸俱入內藏庫時於奉宸中得龍涎香二琉璃缶玻璃母二大篋玻璃母者若今之鐵滓然塊大小猶兒拳人莫知其力又歲久無籍且不知其所從來或云柴世宗顯德間大食所貢又謂眞廟朝物也玻璃母諸璫以意用火煨而模寫之但能作珂子狀青紅黃白隨其色而不克自必也香則多分錫大臣近侍其模製甚大而外視不甚佳每以一豆大爇之輒作異花氣芬郁滿座終日略不歇於是太上大奇之命籍被賜者隨數多寡復收取以歸中禁因號曰古龍涎爲貴也諸大璫爭取一餅可直百緡金玉爲穴而以青絲貫之佩於頸時於衣領間摩挲以相示由此遂作佩香焉今佩香蓋因古龍涎始也

于闐國朝貢使每來必攜其寶鑛以往反自國初迨今如是也我主客備見之寶一鐵鑛爾蓋其來道涉流沙踰三日程無薪水獨挈其水而行是鑛者投以水頃輒已百沸矣用是得不乏故寶之

金蠶毒始蜀中近及湖廣閩粵浸多有人或舍去則謂之嫁金蠶率以黃金釵器錦段置道左俾他人得焉鬱林守爲吾言嘗見福清縣有訟遭金蠶毒者縣官治求不得蹤或獻謀取兩刺蝟入捕必獲矣蓋金蠶畏蝟蝟入其家金蠶則不敢動雖匿榻下墻罅果爲兩蝟擒出之亦可駭也又嶠嶺多蜈蚣動長二三尺螫人求死不得然獨畏托胎蟲多延行井幹墻壁上蜈蚣雖大偶從下過托胎蟲必自落於地蜈蚣爲局縮不得行托胎蟲乃徐徐圍繞周匝蜈蚣愈益縮然後登其首陷腦而食之以故人遭蜈蚣害必取托胎蟲涎輒生搗塗焉痛立止且金蠶甚毒若有鬼神蜈蚣若是之強且大也然蝟捕金蠶托胎制蜈蚣物理有不可致詰而不可不知者如此

往時川蜀俗喜行毒而成都故事歲以天中重陽時開大慈寺多聚人物出百貨其間號名藥市者於是於牕隙間呼貨藥一聲人識其意亟投以千錢乃從牕隙間

度藥一粒號解毒丸故一粒可救一人命夫迹既叵測故時多疑出神仙政和間祐陵以仁經惠天下嘗卽上清寶籙宮之前新作兩亭左曰仁濟給藥治疾苦右曰輔正主符水除邪鬼因遂詔海內凡藥之治病彰彰有聲者悉索其方書上之於是成都守臣監司奉命相與窮其狀乃始得售解毒丹家蓋世世懼行毒者讎害故匿其迹非有所謂神仙也既據方修治得其全卽并藥奏御事下殿中省上曰朕自弛天子所服御以濟元元母煩有司也由是殿中省羣醫師驗其方則王氏博濟方中之保靈丹方爾當是時尤子行適領殿中監事故獨得其詳吾落南來用是藥嘗救兩人食葫蔓草毒得不死蓋不可不書

花蕊夫人蜀王建妾也後號小徐妃者大徐妃生王衍而小徐妃其女弟在王衍時二徐坐游燕汚亂亡其國莊宗平蜀後二徐隨王衍歸中國半塗遭害焉及孟氏再有蜀傳至昶則又有一花蕊夫人作宮詞者是也國朝降下西蜀而花蕊夫人又隨昶歸中國昶至且十日則召花蕊夫人入宮中而昶遂死昌陵後亦惑之嘗造毒屢爲患不能遂太宗在晉邸時數諫昌陵而未克去一日從上獵苑中花蕊夫人在側

晉邸方調弓矢引滿擬走獸忽回射花蕊夫人一箭而死始所傳多僞不知蜀有兩花蕊夫人皆亡國且殺其身

江湖間小龍號靈異見諸傳說甚悉崇甯中淮水暴漲而汴口檣舟不能進一日味爽小龍者出運綱之舟尾有柁工之婦不識也謂是蜥蜴撥置之則又緣柁而上婦怒舉火柴擊其首隨擊霹靂大震一聲汴口官私舟船七百隻皆自相撞擊俱碎死數十百人朝廷聞而不樂第命官爲賑卹焉會發運使上計而小龍者又復出大漕甚窘懼乃焚香祝之願與王偕上計入覲天子可乎龍卽作喜悅狀因舉身入香匳中不動大漕遂攜至都輦先以示魯公得奏聞上遣使索入內爲具酒核以祝之龍輒躍出匳中兩爪據金盃飲幾醕於是天子異之取大琉璃合貯龍爲親加封識焉降付都城汴水之都門外小龍祠中一夕封識宛如故視缶中龍則已變化去矣上喜加封四字仍大敞其祠宇至大觀末魯公謫東南舟行始抵汴口而小龍又出迓魯公然小龍所隸南北當江湖間素不至二浙也政和壬辰魯公在錢塘居鳳山之下私第以正月七日小龍忽出佛堂中於是家人大小咸歎異疑必有故明日而召

命至復加六字王及靖康之初家破魯公貶嶺外吾從行至江陵將遵陸出鼎澧間公畏暑因改舟行下江陵憩渚宮之沙頭一倉官廨舍纔弛檐則龍復出見魯公爲之涕下且感念龍神乃不忘恩舊如此吾戲公曰固知小龍之必來爾公譔詢其故吾曰此亦出公之門也苟每加意於是無世情者則今日必來使此龍一出世間有世情當又不來是烏足辱人懷抱耶公乃收淚而笑

嶺右俗瀆物賤始吾以靖康丙午來博白時虎未始傷人獨村落間竊羊豕或婦人小兒呼噪逐之必委置而走有客嘗過墟井繫馬民舍籬下虎來瞰籬客懼民曰此何足畏從籬旁一叱而虎已去村人視猶犬然十年之後流寓者日衆風聲日變百物湧貴而虎浸傷人今則啗人與內地弗殊風俗澆厚亦及禽獸耶先王中孚之道信及豚魚知必不誣

博白有遠村號錄舍皆高山大水人跡罕及斗米一二錢蓋山險不可出有小江號龍潛魚大者動長六七尺癡不識人村民自誇我山多鳳凰吾且謂妄從而詰之則曰其大如鵝五色有冠率居大木之顛穴木而巢焉遇天氣清明必出出必雙飛所

過則諸鳥斂翼俛首而伏不敢鳴者久之吾歎曰此真鳳凰也古人謂南方丹山產鳳爲信

宋蔡條撰

鐵圍山叢談終

欽定四庫全書提要

珩璜新論一卷

宋孔平仲撰平仲字毅父一作義甫清江三孔之一也治平二年進士元祐中提點京西刑獄坐黨籍安置英州崇甯初召爲戶部金部郎中出提舉永興路刑獄帥郵延環慶黨論再起奉祠以卒事蹟具宋史本傳是書一曰孔氏雜說然吳曾能改齋漫錄引作雜說而此本卷末有澆熙庚子吳興沈詵跋稱渝川丁氏刊版已名珩璜論則宋時原有二名今刊本皆題雜說而鈔本皆題珩璜新論蓋各據所見本也是書皆考證舊聞亦間託古事以發議其說多精核可取蓋清江三孔在元祐熙甯之間皆卓然以文章名非言無根柢者可比也卷末附錄雜說七條在詵跋之前皆此本所佚疑爲詵所補鈔今併附入以成完書至珩璜之名詵已稱莫知所由又以或人碎玉之

解爲未是考大戴禮載曾子曰君子之言可貫而佩珩璜皆貫而佩者豈平仲本名雜說後人推重其書取貫佩之義易以此名歟考平仲與同時劉安世蘇軾南宋林栗唐仲友立身皆不愧君子徒以平仲安世與軾不協於程子栗與仲友不協於朱子講學家遂皆以寇讎視之夫人心不同有如其面雖均一賢者意見不必相符論者但當據所爭之一事斷其是非不可因一事之爭遂斷其終身之賢否韓琦富弼不相能不能謂二人之中有一小人也因其一事之忤程朱遂併其學問文章德行政事一概斥之不道是何異佛氏之法不問其人之善惡但皈五戒者有福謗三寶者有罪乎安世與軾炳然與日月爭光講學家百計詆排終不能滅其著述平仲則惟存本集談苑及此書栗惟存周易經傳集解一書仲友惟存帝王經世圖譜一書援寡勢微鑠於衆口遂俱在若存若亡間實抑於門戶之私非

至公之論今仍加甄錄以持其平若沈繼祖之樞林集散見於永樂大典者尙可排緝成帙以其人不足道而又與朱子爲難則棄置不錄以昭褒鉞凡以不失是非之真而已

古今說海

孔氏雜說

說略十三 雜記十三

漢孔安國字安國晉安帝名德宗字德宗恭帝名德文字德文會稽王名道子字道子乃至北史慕容紹宗馮子琮魏蘭根南史蔡興宗唐郭子儀辛京杲戴休顏張孝忠尙可孤孟浩然顏見遠田承嗣田承緒張嘉貞宇文審李嗣業皆以名爲字

王羲之子徽之徽之子禎之王允之子晞之晞之子肇之王晏之子崑之崑之子陋之皆三世同用之字胡母輔之子謙之吳隱之子瞻之顏悅之子愷之皆兩世同用之字

太史公父名談故史記無談字季布傳改趙談作趙同范曄父名泰故後漢書無泰字郭泰鄭泰皆改作太字李翱父名楚金故其所爲文皆以今爲茲韓愈作諱辯持言在不言徵之說故父名仲卿未嘗諱焉晉曹志者植子也奏議武帝云榦植不强不諱植字三國時猶不諱其君呂岱傳張承與岱書云功以權成是斥孫權名也文王可以爲文君張衡賦文君爲我端著是也北狄可以爲蠻史記匈奴傳獫狁葷

粥居於北蠻是也二典可以爲謨馬融曰憂擊鳴球載於虞謨是也堯典亦可謂之唐書吳陸抗傳靜言庸違唐書攸戒是也韶可以爲禹樂史記禹興九韶之樂是也三王亦得稱帝史記夏紀帝桀是也獻俘不獨人也物皆可以爲俘俘取也書云俘厥寶玉是也匄不止於自乞也與人亦可稱匄前漢廣川王越傳盡取善繒匄諸宮人注匄遺也賄不獨賂也賜皆可以爲賄書賄肅慎之命是也診不止脉也視物皆可以爲診後漢王喬傳尙方診視寫是也餉不止飲食也贈皆可以爲餉魏文紀注以詩賦餉孫權徐孝穆有答餉鏡詩是也城邑亦可謂之弊趙世家馮亭以城市邑十七弊吾國是也稱譽亦可謂之薦伯夷傳七十子之徒仲尼獨薦顏淵是也龍不獨以譬君德凡有德者皆可以龍言也諸葛亮嵇康皆號臥龍孔融薦禰衡云龍躍天衢袁宏贊武侯云初九龍盤雅志彌確樊英傳注安帝徵隱士策文云使難進易退之人龍潛不屈許劭許虔汝南平輿音預人人稱平輿淵有二龍焉唐烏承玘與兄承恩人號轅門二龍陰興謂貴人曰亢龍有悔以譬外戚之象如此之類甚多然則龍不止比君德矣

父命得爲敕後漢樊重焚券諸子從敕是也叔可稱大人疏受對疎廣云從大人議是也母亦稱大人前漢淮陽獻王傳張博云王遇大人亦解後漢范滂就獄與母訣曰大人割不忍之恩是也父可以稱聖善楊修答曹植書有聖善之教注謂武帝也人臣不嫌稱萬歲馬援傳援釃酒享軍士皆伏稱萬歲是也上父母壽可萬壽潘岳閒居賦稱萬壽以獻觴是也屋之高巖通謂之殿前漢霍光傳鴟鳴殿前樹上黃霸傳郡國上計長史一輩先上殿是也白事丞相亦可謂之奏事魏相傳帶劍奏事是也造謁人亦可謂之朝司馬相如傳臨邛今日往朝相如是也人臣得言垂拱薛宣自言垂拱蒙成是也人臣得言端拱謝孚言端拱笑咏謝鯤言端拱廟堂是也人臣得言諒闇山濤傳武帝詔云山太常雖居諒闇是也人臣得稱聖君賢君晉曹摅一縣號曰聖君薛宣傳屬縣各得賢君是也漢時射策對策其事不同蕭望之傳註云射策者謂爲難問疑義書之於策量其大小署爲甲乙之科列而置之不使彰顯有欲射者隨其所取得而擇之以知優劣射之言投射也對策者顯問以政事經義令各對之以觀其文辭定高下也晉史潘京爲州所辟謁見問策探得不孝字刺史戲

曰辟士爲不孝邪答曰今爲忠臣不得爲孝子亦射策遺法耳

相之不可憑也南史庾夔家富於財食必列鼎又狀貌豐美頤頰開張人皆謂必爲方伯及魏尅江陵夔以餓死時又有水軍都督褚蘊面甚尖危從理入口竟保衣食而終唐柳渾十餘歲有巫告曰兒相夭且賤出家可免死渾不從仕至宰相魏朱建平善相鍾繇以爲唐舉許負何以復加然相王肅年踰七十位至三公肅六十二終於中領軍耳史氏以爲蹉跌吾以爲相不可憑也南史徐陵八歲屬文十三通莊老光宅寺慧雲法師每嗟陵早夭陵仕至太子少傅年至七十七唐孔若思傳孔季詡擢制科授校書郎陳子昂嘗稱其神清韻達可比衛琢而季詡終於左補闕使徐陵夭而不壽季詡遂至顯官則人遂以爲風鑒之驗矣吾以此知風鑒之不可憑也佛果何如以舍身爲福則梁武以天子奴之不免侯景之禍以莊嚴爲功則晉之王恭修營佛寺務在壯麗其後斬於倪唐以持誦爲獲報則周嵩事佛精進王敦害之臨刑猶如市誦經竟死刃下佛果何如哉佛出於西胡言語不通華人譯之成文謂之經而晉人諸君子甚好於此今世所謂經說性理者大抵多晉人文章也謝靈運

繙經臺今尙存焉唐傳奕謂佛入中國熾兒丐夫模象莊老以文飾之姚元崇治令其說亦甚詳霍去病破匈奴獲休屠祭天金人注祭天以金人爲主休屠祠金人也師古曰今之佛像_{是也}其後休屠王太子歸漢以金人之故賜姓金氏卽日磾也據此則前漢時佛像已入中國矣凡今之佛像皆祭天之主也其盛有天助焉爾後漢明帝夢見金人以爲佛於是遣使天竺國圖其形像楚王英始信其術齋戒祭祀陶謙傳笮融大起浮屠寺作黃金塗像浴佛設飯前漢西域傳塞王南君剽賓塞種分散往往爲數國自疏勒以西北休循捐毒之屬皆故塞種_{塞先}得反捐毒卽身毒天竺也後漢襄楷傳注浮屠卽佗聲之轉耳史記大月氏傳身毒國在大夏東南數千里其俗土著與大夏同而卑溼暑熱按後漢西域傳天竺一名身毒今浮屠像多赤足此卑瀝暑熱之驗也又云其民乘象以戰今浮屠像亦跨象云

霍去病傳諸宿將嘗流落不耦注流謂遲留落謂墜落據出處流字合作畱

漢高祖父太上皇前史不載其名後漢章帝紀祠太上皇於萬年注名熾_{他官}一名執嘉高后紀載高祖母曰昭靈后

管仲謂之管敬仲出左傳閔公元年子產謂之子美出左傳襄公二十五年原憲字子思出史記張宗字諸君杜茂字諸公陳忠傳記注施延字君子出後漢書四皓名氏鄉里可見者東園公姓園名秉字宣朝陳雷襄邑人常居園中故號園公夏黃公姓崔名郭字少通齊人隱居修道號可黃公陶潛作聖賢羣輔錄云出皇甫謐高士傳揚雄所稱李仲元者名弘出蜀秦密傳鄭子真名撲嚴君平名尊出前史王貢兩龔傳注伯樂姓孫名陽字伯樂秦穆公時人出莊子馬蹄疏莊周字子休出列子辛計然范蠡師也姓辛氏字子文或曰計研或曰計倪出史記索隱杜康字仲甯出魏武短歌行注楚狂接輿姓陸氏名通師曠字子野並出莊子疏伯夷姓墨名允字公信孤竹君之子也叔齊名智字公達伯夷弟也夷齊謚也見論語疏引春秋少陽篇齊隋婦人施慕懼全身彰蔽也唐永徽以後皆用帷帽拖裙到頸漸爲淺露若今之蓋頭矣先是婦人猶乘車輿唐乾元以來乃用兜籠若今之檐子矣唐志載咸亨中勅云多著帷帽遂棄慕懼曾不乘車別坐檐子

謂人爲明公閣下之類亦可謂之高明孔融傳李膺謂融曰高明必爲偉器又曰高

明父祖與僕有舊恩明公亦可謂之仁公溫嶠書與陶侃謂侃爲仁公明府亦可謂之明庭張儉傳李篤謂毛欽曰雖好義明庭今日載其半矣賢相亦可謂之賢宰左雄傳論曰陳蕃楊秉世稱賢宰

昔時文字未有印板多是寫本齊宗室傳衡陽王鈞常手自細寫五經置於巾箱中巾箱五經自此始也

今之更點擊鈺唐六典皆擊鐘也太史門有典鐘二百八十人常擊編鐘

今公家文字用仰字北史時已有此語北齊孝昭皇帝紀詔定三恪禮儀體式亦仰議之

俗所謂累重亦有所出也前漢西域傳屯田輪臺募民壯健有累重敢徙者詣田所注累謂妻子家屬也

俗所謂阿誰三國時已有此語龐統傳向者之論阿誰爲是

俗所謂日子亦有所出文選曹公檄吳將校部曲文年月朔日子注發檄時也然則日子日時也

工夫或作功字魏志王肅傳太極已前功夫尙大也

俗所謂停待晉書已有此語愍懷太子傳陛下停待是也

俗所謂日許者爾許也聲之訛也啟顏錄詠短人云城門爾許高故自匍匐入

俗呼抽替南史殷淑儀孝武帝之貴妃也有寵而斃帝思見之遂爲抽替棺欲見輒引替覩屍

前鮑宣傳注持時夜行夜行如今持更是已持時如今報時是已漢官儀黃門持五夜甲夜乙夜丙夜丁夜戊夜亦如今五更也

俗呼牝馬爲課馬出唐六典凡牝四游而課羊則當年而課之課謂歲課駒犢

文帝七年令列侯太夫人夫人無得擅徵捕如淳曰列侯之妻稱夫人列侯死子復爲列侯乃得稱太夫人子不爲列侯不得稱也然則婦人稱太者蓋如是耳

孔平仲撰

字毅父
臨江人

古今說海

瀟湘錄

說略十四 雜記十四

高宗承祧後多患頭風召醫於四方終不得療有一宮人忽自陳世業醫術請修合藥餌高宗初未之信及堅論奏遂令宦者監之修藥宮人開坎作藥爐穿地方深一二尺忽有一蝦蟆跳出如黃金色背上有朱書一字宮人不敢匿其事乃進於上高宗不曉其兆遽命放於後苑池內宮人遂別擇地穿藥爐方深一二尺復得前金色蝦蟆又聞於上上惡之以爲不祥命殺而棄焉至夜其修藥宮人及宦者皆無疾而卒

則天末年益州有一老父攜一藥壺於城中賣藥得錢卽轉濟貧乏自不食時卽飲淨水如此經歲餘百姓賴之有疾得藥者無不愈或自游江岸閒眺永日又或登高引頸不語每遇有識者必告之曰人一身便如一國也人心卽帝王也傍列臟腑卽宰輔也外具九竅卽羣臣也故心病則內外不可救之何異君亂於上臣下不可止之乎但凡欲身之無病必須先正其心不使氣索不使狂思不使嗜慾不使迷惑則

心先無病心無病則餘臟腑雖有病不難療也外之九竅亦無由受病也况藥有君有臣有佐有使或攻其病君先臣次然後用佐用使自然合宜如失其序必自亂也又何能救病此猶家國任人也老夫賣藥常以此爲念每見愚者一身君不君臣不臣使九竅之邪恣納其病以至於良醫自逃名藥不効猶不自知悲夫士君子記之忽一日獨詣錦江解衣淨浴探壺中唯選一丸藥自吞之謂衆人曰老夫謫罪已滿今却歸島上俄化爲一白鶴飛去其衣與藥壺並沒於水求尋不得

相國李林甫家一奴號蒼璧性敏慧林甫憐之忽一日卒然而死經宿復蘇林甫問之曰死時到何處見何事因何却得生也奴曰死時固不覺其死但忽於門前見儀仗擁一貴人經過有似君上方潛窺之遽有數人走來擒去去至一峭拔奇秀之山俄及一大樓下須臾有三四人黃衣小兒曰且立於此候君旨見殿上捲一朱翠簾依稀見一貴人坐臨階砌似剗斷公事殿前東西立仗衛約千餘人有一朱衣人攜一文簿奏言是新奉命亂國革位者安祿山及祿山後相次三朝亂主兼同時悖亂貴人定案殿上人問朱衣曰大唐君隆基君人之數雖將足壽命之數未足如何朱

衣曰大唐之君奢侈不節儉本合折數但緣不好殺有仁心故壽命之數在焉又問曰安祿山之後數人僭爲僞主殺害黎元當須速止之無令殺人過多以傷上帝心慮罪及我府事行之時當速止之朱衣奏曰唐君紹位臨御以來天下之人安堵樂業亦已久矣據期運推遷之數天下之人亦合罹亂惶惶至矣廣害黎元必至傷上帝心也殿上人曰宜速舉而行之無失他安祿山之時也又謂朱衣曰宜便先追取李林甫楊國忠也朱衣曰唯受命而退俄頃有一朱衣捧文簿至奏言大唐第六朝天子復位及佐命大臣文簿殿上人曰可惜大唐世民効力甚苦方得天下治到今日復亂也雖嗣主復位乃至於末代終不治也謂朱衣曰但速行之朱衣奏訖又退及將日夕忽殿上有一小兒急喚蒼璧令對見蒼璧方子細見殿上一人坐碧玉案衣道服帶白玉冠謂蒼璧曰當却回寄語李林甫速來歸我紫府應知人間之苦也蒼璧尋得放回林甫知必不久時亂矣遂潛恣酒色焉

楊貴妃忽晝寢驚覺見簾外有雲氣氤氳令宮人視之見一白鳳銜一書有似詔勅自空而下立於寢殿前宮人白貴妃貴妃起而熟視之遂命焚香親受其書命宮嬪

披讀其文曰勅謫仙子楊氏爾居玉闕之時常多傲慢謫塵寰之後轉有驕矜以聲色惑人君以寵愛庇族屬內則韓虢蠹政外則國忠秉權殊無知過之心顯有亂時之迹比當限滿合議復歸其如罪更愈深法不可貸專茲告示且與沉淪宜令死於人世貴妃極惡之令宮闈間切祕此事亦不聞於上其鳳尋飛去其書藏於玉匣中三日後失之

天寶年中楊國忠權勢漸高四方奉貢珍寶莫不先獻之豪富奢華朝廷間無敵忽有婦人自投其宅請見國忠闈人拒之婦人大叫言於闈曰我直有一大事要白楊公爾如何艱阻我若不令得見楊公我當令火發盡焚楊公宅闈人懼遂告國忠國忠甚驚遽召見婦人見國忠曰公爲相國何不知否泰之道邪公位極人臣又聯國戚名動區宇亦已久矣奢侈不節德義不修壅塞賢路諂媚君上又久矣略不能效前朝房杜之蹤跡以社稷爲念賢愚不別但納賄於門者爵而祿之才德之士伏於林泉不一顧錄以恩付兵柄以愛使民牧噫欲社稷安而保家族必不可也國忠大怒問婦人曰汝自何來何造次觸犯宰相不懼死邪婦人曰公自不知有死罪翻以

我爲死罪國忠極怒命左右欲斬之婦人忽復自滅國忠驚疑未久又復立於前國忠問曰是何妖邪婦人曰我實惜高祖太宗之社稷將被一疋夫傾覆公不解爲宰相雖處輔佐之位無輔佐之功公一死小事爾可痛者國自此弱幾不保其宗廟亂將至矣胡怒之邪我來白於公胡多事也我今却退胡有公也公胡死也民胡災也言訖笑而出令人逐之不見後至祿山起兵方悟胡字焉

杜修己者趙人也善醫其妻卽趙州富人薛氏女也性淫佚修己家養一白犬甚愛之每與珍饌食後修己出其犬突入室內欲嚙修己妻薛仍似有姦私之心薛氏因怪而問之曰爾欲私我耶若然則勿嚙我犬卽搖尾登其床薛氏懼而私焉其犬略不異於人爾後每修己出必姦淫無度忽一日方在內同寢修己自外入見之因欲殺犬犬走出修己怒出其妻薛氏後歸薛贊半年其犬忽突入贊家口銜薛氏髻而背負走出家人趕奪之不得不知所之犬攜薛氏直入恒山潛之每至夜卽下山竊所食之物晝則守薛氏經一年薛氏有孕生一男雖形貌如人而徧身白毛薛氏只於山中撫養之又一年其犬忽死薛氏乃抱子迤邐出山入冀州乞食有知此事者

遠詣薛贊家以告贊遽令家人取至家其所生子年十七形貌醜陋性復兇惡每私走作盜賊或旬餘或數月卽復還薛贊患之欲殺焉薛氏乃私誠其子曰爾是一白犬之種也幼時我不忍殺爾今日在他薛家豈合更不謹若更私出外爲賊薛家人必殺爾實恐爾累及他當改之其子大號泣而言曰我稟犬之氣而生也無人心好殺爲賊自然耳何以爲過薛贊能容我卽容之不能容我卽當與我一言何殺我邪母當自愛我其遠去不復來矣薛氏堅畱之不得乃謂曰去卽可何不時來一省我也我是爾之母爭忍不見也其子又號哭而言曰後三年我復來耳攜劍拜母而去又三年其子領羣盜千餘人至門自稱曰將軍旣入拜母後令羣盜殺其薛贊家屬唯畱其母焚其宅攜母而去

李隱撰

守秘書省
校書郎

古今說海

三水小牘

說略十五 雜記十五

韓文公之寢疾也名醫良藥日進有加而無瘳忽宵中驚悸既寤而汗霑衾裯命侍人扶坐小君問之良久日向來夢神人長丈餘金鎧持戟直入寢門我不覺降階拜之自稱大聖瞋目謂我曰雖遂骨稅國世與韓爲讎吾欲討之而不能如何我跪答曰願從大聖討焉不旬日而文公薨果從其請矣

滎陽郡城西有永福湖引鄭水以注之平時繞岸皆臺榭花木乃太守郊勞班餞之所西南塢多修竹喬林則故徐帥崔常侍彥曾別業也當咸通中龐勛之作變崔公爲所執也湖水如凝血者三日而復未幾而其家凶問至余光啓初寓居鄭地故得之昔讀本朝書見河間王之征輔公祐也江行舟中宴羣帥命左右以金盃酌江水至忽化爲血合坐失色王徐曰盃中之血公祐授首之徵果破之則禍福之難明也如是

陸存者愚儒也衰白之後方調授汝州剡城令時乾符丁酉歲也是秋王仙芝黨興

起自海沂來攻郡途經剡城存微服將遁爲賊所虜其酋問曰汝何等人也存給之曰某庖人也乃令漉煎油作齏麩者移時不成賊酋怒曰這漢謾語把劍來存懼急撮麩兩手速拍曰祖祖父父世世業業衆大笑釋之時縣尉李庭妻崔氏有殊色賊至爲所掠將妻之崔氏大詬曰我公卿家女爲士子妻死乃緣命豈可受草賊污辱賊怒劓其心而食見者無不灑涕

汝州魯山縣西六十里小山間有祠曰女靈觀其像獨一女子焉低鬟頰蛾艷冶而有怨慕之色祠堂後平地怪石圍數畝上擢三峯皆十餘丈森然肖泰華也詢之老人云大中初斯地忽暴風驟雨襄丘陵震屋瓦一夕而止遂有茲山其神見形於樵蘇者曰吾商於之女也帝命有此百里之境可告鄉里爲吾立祠於山前山亦吾所持來者無曠時祭當福汝鄉人遂建祠官書祀典厯數世矣咸通末余調補縣印吏實尸嘗祭與同舍生譙國夏侯禎偕行祭畢與禎縱觀祠內禎獨眷眷不能去乃索卮酒酌曰夏侯禎於年未有匹偶今者仰覲靈姿願爲廟中掃除之隸神其鑒乎旣舍爵乃歸其夕夏侯生愀恍不寐若爲陰靈所中其僕來告余走視之則目瞪口噤

不能言矣余謂曰得非女靈乎禎頷焉余命吏載楮鏹潔尊席而禱曰夫人嶽鎮愛女疆場明祇致禾黍豐登戢虎狼暴殄斯神之任也今日之祭乃郡縣常祀某職其事敢不嚴恭豈謂友生不勝醜學之餘至有慢言黷於神聽今疾作矣豈降之罰邪抑果其請邪若降之罰是以一言而斃一國士是違好生之德當專戮之辜帝豈不降鑒而使神祇虐於下乎若果其請是以一言舍貞靜之道播淫佚之風緣張碩而動雲輶顧交甫而解明珮若九闔一叫必貽幃箔不修之責况天下多美丈夫何必是也神其聽之奠訖夏侯生康豫如故

渤海封夫人諱詢字景文天官侍郎敖孫也諸兄皆貢士有聲於名場夫人氣韻恬和容止都雅善草隸工文章盛飾則芙蓉出綠波巧思則柳絮因風起至於婉靜之法剪製之工固不學而生知嫺黨號爲淑女咸通戊子歲始從媒贄移天於殷門故秘省校書保晦遐構遐構兄余寮壻也愛鍾自出姑實親姨夙夜蒸蒸劬勞無怠廣明庚子歲妖纏黃道釁啟白丁關輔烽飛輦轂遐狩以天府陸海之盛奄化於鯨鯢腹中卽冬十二月七日也邦人大潰校書自永甯里所居盡室潛於蘭陵里蕭氏池

臺地隣五門以爲賊不復入至明日羣凶霧合秘校遂爲所俘賊酋覩夫人之麗將欲叱後乘以載之夫人正色相拒確然不移誘說萬辭但瞑目反背而莫顧日將夕賊酋勃然起曰行則保羅綺於百齡止則取齎粉於一劍夫人奮袂罵曰狂賊狂賊我生於公卿高門爲士君子正室琴瑟叶奏鳳凰和鳴豈意昊天不容降此大厲守正而死猶生之年終不負穢包羞於汝逆豎之手言訖遇害賊酋旣去秘校脫身來歸侍婢迎門白夫人逝矣秘校拊膺失聲而前枕屍於股大慟良久揮淚於夫人面曰景文景文卽相見遂長號而絕三婢子覩主父主母俱殞乃相攜投浚井而死人曰噫二主二夫實士女之醜行至於臨危抗節乃丈夫難事豈謂今見於女德哉渤海之媛汝陰之嬪貞烈規儀永光於彤管矣辛丑歲遐搆兄出自雍話茲事以余有春秋學命筆削以備史官之闕

廣明庚子歲余在汝墳溫泉之別業夏四月朔旦雲物暴起於西北隅瞬息間濃雲四塞大風壞屋拔木雨且雹雹有如杯捲者鳥獸盡殪被於山澤中至午方霽觀行潦之內蝦蟹甚衆明日余抵洛城自長夏門之北夾道古槐十拔去五六矣門之鷗

吻亦失矣余以爲非吉徵也至八月汝州召募軍李迺光等一千五百人自鴈門回掠東都南市焚長夏門而去入蜀自茲諸夏騷蕩矣上天垂戒豈虛也哉

許州長葛令嚴郃衣冠族也立性簡直雖羈束於官署常畜退心咸通中罷任乃於縣西北境上陘山陽置別業良田萬頃桑柘成陰奇花芳草與松竹交錯引泉成沼疏阜爲臺盡登臨之志矣夫人河東裴氏有三女長適滎陽鄭氏次適京兆杜氏幼曰阿珊特端麗妍瑩乙巳歲年十五矣時清明節嚴公盡室登陘山山西岑有鄭大王祠乃於祠中薦酒饌令諸女縱觀日晚方歸降及山之半旋風忽起於道左繚繞諸女塵坳陰晦衆皆驚懼而阿珊獨仆於地色變不能言鬢上失雙金翹乃扶持而歸召巫者視之巫譯神言曰我鄭大王也今聘爾女爲第三子婦其家遽使齋酒殺紙錢令巫者詣祠祈之既至得金翹於神座上巫者再三請禱神終言不可明日阿珊殞便憑巫言以達所以嚴氏遂令送服玩設禮筵於祠內厥後每有所須必託巫言告其家嚴公夫人卽余室之諸姑也故得其實而傳之

皇甫枝撰

字遵美
安定人

三水小牘終

欽定四庫全書提要

談藪一卷

舊本題龐元英撰元英有文昌雜錄已著錄案元英爲宰相籍子乃元豐中人此書乃多述南宋甯理兩朝事相距百載其僞殆不足攻書中凡載雜事二十五條皆他說部所有殆書賈鈔合舊文詭立新目售僞於藏書之家者厲鶚等南宋雜事詩註亦誤採之蓋偶未考然尤侗明史藝文志作於康熙己未業已著錄則其僞作自前明矣

古今說海

談藪

說略十六 雜記十六

王公袞字吉老宣子尙書之弟先墓在會稽西山爲掌墓人奚泗所發公袞訴之郡杖之而已公袞憤甚奚泗受杖詣公袞謝罪公袞呼前勞以酒拔劍斬之持其首詣郡宣子時爲侍郎奏乞以己官贖罪詔給舍集議中書舍人張孝祥等議上詔赦之猶鐫一秩當時公袞孝名聞天下永嘉王十朋以詩美之公袞性甚和平居常若嬉笑人謂之笑面虎

甄龍友雲卿永嘉人滑稽辨捷爲近世之冠樓宣獻自西掖出守以首春觴客甄預坐席間謂公曰今年春氣一何太盛公問其故甄曰以果匱甘蔗知之根在公前而末已至此公爲罰掌吏衆訾其猥率遊天竺寺集詩句贊大士大書於壁云可笑倩兮美目盼兮彼美人兮西方之人兮孝廟臨幸一見賞之詔侍臣物色其人或以甄姓名聞曰是溫州狂生用之且敗風俗上曰惟此一人朕自舉之甄時爲某邑宰趣召登殿上迎問曰卿何故名龍友甄罔然不知所對既退乃得之曰君爲堯舜之君

故臣得與夔龍爲友由是不稱旨猶得添倅後至國子監簿甄嘗頌臨安北山大佛頭云色如黃金面如滿月盡大地人只見一槩禪人多許之

沈詹事特口坐葉丞相論恢復貶筠州沈方售一妾年十七八攜與俱行處筠凡七年既歸呼妾父母以女歸之猶處子時人以此張忠定公詠會稽潘方仲矩爲安吉尉獻詩云昔年單騎向筠州覓得歌姬共遠遊去日正宜供夜直歸來渾未識春愁禪人尙有香囊愧道士猶懷炭婦羞鐵石心腸延壽藥不風流處却風流

錢處和參政好餌鼠爲侍從居臨安每日食畢輒以大盆貯餘饌三擊盆則羣鼠累累然來食訖乃去以爲常洎遷政府鼠復至以其相距差近不怪也已而帥越帥閩繼掛冠歸里鼠至如初迨錢亡乃不見

洪文惠文敏兄弟皆畏內雖少年貴達家有聲妓之奉往往不能快意王宣子知饒州景伯家居喪偶宣子吊焉主人受吊已延客至內齋喚酒小酌甫舉杯羣妾盃出素粧靚態黛色粉光不異平日謔浪笑語酒行至無算景伯半酣握王手曰不圖今日有此樂賓主相顧一笑後二十年宣子謝事歸越景盧來爲守時已鰥居暇日宣

子造郡齋景盧畱款亦出家姬侑席笑謂王曰家兄有言不圖今日有此樂王爲絕
倒

謝希孟在臨安狎娼陸氏象山責之曰士君子乃朝夕與賤娼女居獨不愧於名教
乎希孟敬謝請後不敢他日復爲娼造鴛鴦樓象山聞之又以爲言謝曰非特建樓
且有記象山喜其文不覺曰樓記云何卽口占首句云自遜抗機雲之死而天地美
靈之氣不鍾於世之男子而鍾於婦人象山默然希孟一日在娼所忽起歸興遂不
告而行娼追送江漕泣涕戀戀希孟毅然取領巾書一詞與之云雙槳浪花平夾岸
青山鎖你自歸家我自歸說着如何過我斷不思量你莫思量我將你從前於我心
付與旁人呵希孟與鄉人陳伯益好相調戲伯益面黑而狹多髯希孟入其書室見
寫真掛壁上題云伯益之面大無兩指髭髻不仁侵擾乎其旁而不已於是乎伯益
之面所餘無幾此語喧傳伯益病之而莫能報希孟後避甯宗諱改名直字古民伯
益於是以兩句咏其名炊餅擔頭挑去白衣鋪上喝將來聞者笑倒伯益又嘗寫
眞衣阜道服躡僧鞵希孟贊之曰禪鞵俗人鬚鬢道服儒巾面皮秋水長天一色落

霞孤鷺齊飛

曹詠侍郎妻碩人厲氏餘姚大族女始嫁四明曹秀才與夫不相得仳離而歸乃適詠時尙武弁不數年以秦會之媼黨易文階驟擢至徽猷閣守鄞元夕張燈州治大合樂宴飲曹秀才攜家來觀見碩人服用精麗左右供侍備極尊嚴謂其母曰渠乃合在此中居享如此富貴吾家豈能留歎息久之詠日益顯爲戶部侍郎尹京會之殂詠貶新州而亡碩人領二子取喪歸葬二子復不肖家貧蕩析至不能給朝晡趙德老觀文亦厲氏壻碩人從父妹也憐其老且無聊招置四明里第養之終身碩人間出訪親舊過故夫曹秀才家門庭整潔花竹翳茂顧侍婢曰我當時能自安於此豈有今日因泣下數行二十年間夫妻更相悔羨世態番復不可料如此方詠盛時鄉里奔走承迎惟恐後獨碩人之兄厲德斯不然詠銜怒帥越時德斯爲里正詠風邑官脅治百端冀其祈已竟不屈會之甫殂乃遣介致書於詠啟封乃樹倒胡孫散賦一篇泊新州之行又以十詩贈行其一云斷尾雄雞不畏犧憑依撥禍復何疑八千里路新州瘴歸骨中原是幾時詠得詩憤極然無如之何

韓侂胄暮年以冬月攜家游西湖畫船花輿徧覽南北二山之勝未乃寘宴於南園
族子判院與焉席間有獻牽絲傀儡爲土偶負小兒者名爲迎春黃胖韓顧族子汝
名能詩可詠卽承命一絕云脚踏虛空手弄春一人頭上要安身忽然綫斷兒童手
骨肉都爲陌上塵韓大不樂不終宴而歸未幾禍作

樓叔韶鏞初入太學與同窓友厚善休日友謂叔韶寂寂不自聊吾欲至一處求半
日適飲醕膳美又有聲色之玩但不可言君性輕脫或以利口敗吾事能息聲則可
偕往樓敬諾要約數四乃相率出城買小舟沿葦行將十里舍舟陟小坡行道微高
下又二里得精舍門徑絕卑小而松竹花草楚楚然友欸於門卽有小童應客主人
繼出乃少年僧姿狀秀美進趨安詳殊有富貴家氣象揖客曰久別甚思欸接都不
見過何也揖樓爲誰友曰吾親也遂偕坐欸語十刻許僧忽回顧日影下庭西笑曰
日旰二君餒乎便起推西邊小戶入華屋三間窻几如拭玩具皆珍奇喚侍童進點
心素膳三品甘芳精好不知何物所造徹器命推窻平湖當前數十百頃其外連山
橫陳樓觀森列夕陽返照丹碧紫翠互相發明漁歌菱唱隱隱在耳馳望久之僧取

塵尾敲闌干數聲俄時小畫舫傍湖而來二美人徑出登岸靚粧麗色王公家不過也僧命具酌指顧間觴豆羅陳窮極水陸左右執事童皆佼好杯行美人更起歌舞僧與友謔浪調笑歡意無間樓神思愉快正容危坐噤不敢吐一語伺僧盪起挈友臂扣所以友愠曰子但飲食縱觀何用知如許而觴十餘巡夜已艾僧復引客至小閣中臥具皆備曰姑憩此遂去壁外卽僧榻試穴隙窺則徑擁二姬就寢友醉甚大駭樓獨彷徨不寐起如廁一童執燭密詢之此爲何地童笑曰官人是親戚何須問樓反室展轉通宵時側耳審聽但聞鼻息齁齁而已將曉僧已至客寢問安否盃櫛畢引入一院制作尤邃巧簾幕蔽滿庭下奇花盛開香氣芬勃小山叢竹位置愜當回思夜來境界已迷不能憶迨具食則器用張陳一新食品加精獨二姬竟不復出食罷各去僧送之門鄭重而別由他徑絕湖而歸樓惘惘累日疑所到非人間數問友但笑不答亦許尋舊遊而樓用他故亟歸鄉其後出處參商訖不克再諧

唐小說記紅葉事凡四其一本事詩顧況在洛乘間與一二詩友遊苑中流水上得大梧葉題詩云一入深宮裏年年不見春聊題一片葉寄與有情人況明日於上流

亦題云愁見鶯啼柳絮飛上陽宮女斷腸時君恩不禁東流水葉上題詩寄與誰後
十餘日有客來苑中又於葉上得詩以示况曰一葉題詩出禁城誰人酌和獨含情
自嗟不及波中葉蕩漾乘春取次行又明皇代以楊妃號國寵盛宮娥皆衰悴不願
備掖庭嘗書落葉隨御溝水流出云舊寵悲秋扇新恩寄早春聊題一片葉將寄接
流人顧况聞而和之既達聖聽遣出禁內人不少或有五使之號况所和即前四句
也其二雲溪友議盧渥舍人應舉之歲偶臨御溝見紅葉上有詩云流水何太急深
宮盡日閒殷勤謝紅葉好去到人間其三北夢瑣言進士李茵嘗遊苑中見紅葉自
御溝出上有題詩曰與盧渥詩同其四玉溪編事侯繼圖秋日於大慈寺倚闌樓上忽木
葉飄墜上有詩曰拭翠斂愁蛾爲鬱心中事擗筆下庭除書作相思字此字不書名
此字不書紙書向秋葉上願逐秋風起天下有心人盡解相思死余意前三則本只
一事而傳記者各異耳劉斧青瑣中有御溝流紅葉記最爲鄙妄蓋竊取前說而易
其名爲于祐云本朝詞人罕用此事惟周清真樂府兩用之掃花遊云信流去想一
葉怨題今到何處六醜詠落花云飄流處莫赴潮汐恐斷水上有相思字見得脫胎

換骨之妙極矣清眞名邦彥字美成徽宗時爲待制提舉大晟樂府

大溪山在廣州境舊山有一洞其處所人不常識每歲五月五日洞開則見之士人預備墨紙刷帚入其中以手摸石壁覺有罅隙若鐫刻者以墨刷其上紙覆其上印模而出洞亦隨閉持所印紙視之或呪語或藥方所得皆不同亦有不咸字無所得者呪術藥方應用無不效驗蓋南法之所出也

湖南北沙板皆自地發多在人家迸出如筍長數十丈大數十圍或一或二或數株並出人家遭此者皆坼裂傾陷屋宇然析之爲板其利甚博因此家道日進故俗以爲吉祥亦有掘地得板一窖至數百片土人往往以鐵爲長梗入山刺地有板處鐵不能入殊不知地中何以有此也毛義夫云往年平江大旱河水盡涸居民就河底掘旱井或有掘得沙板者愈取愈多相去五里十里必有一處多至四百片亦有得沉香者滄洲云洞板完全者最難得補綴精密雖巧目亦不能辨以沸湯沃之則敗矣

嚴州壽昌縣道旁有朱買臣廟貌其地有朱池朱村居人多朱姓朱謙之詩云貧賤

難堪俗眼低區區何事便雲泥會稽乞得無他念祇爲歸來詫故妻束薪行道自歌
呼越俗安知有丈夫一見印章驚欲倒相看方悔太模糊

漁溪云曩在筠州新昌縣嘗出遊歷將至五峯馬上遙見山中草木蠕蠕動疑爲地
震馭者云滿山皆猴也數以千萬計行人獨過常遭戲虐每羣呼跳浪而至扳緣頭
目胸項手足袞成毛毬雖有兵刃亦無所施往往致死夜宿民家犬爲虎銜去明日
至寺問山中有虎乎曰無有何以無曰山中皆大林虎安敢來余曰林木森森虎所
隱茆何爲不來曰大木上多趨鼠虎過其下鼠必鳴噪自拔其毛投虎身着處必生
蟲則徧身瘡爛以至乎死故畏不敢至方悟宣城包氏畫虎皆平原曠野茅葦叢薄
中亦有棘枝尋丈未嘗作林木者以此隋文帝云譬之猛虎人不能害反爲毛間蟲
所蠹損又可證也

賴省幹之下天下知名賴建甯人挾妖術殺人祭鬼常於浙中尋求十餘歲童女養
之以充用其母喜誦佛書女習念心經後此女次當供祭沐浴裝飾寘空室中鑄其
戶而去女自分必死夜且半覺有物自天窻下光燁燁然不勝怖急念揭諦呪忽口

中亦有光出此物逡巡欲進復却女誦呪益急良久口中光漸大直出射此物物仆牀下鏗然有聲不復起其室近街俄而警夜卒過焉女大叫殺人卒報所屬率衆破壁取女出視壁下物乃大白蟒死矣捕賴及家人鞠問具伏黥配海外籍其家今爲詹安撫居宅

徑山寺主園僧行棗畦間爲蛇傷足久之毒氣蔓延一脚皆爛號呼宛轉常住爲招醫積費數百千不能愈有游僧見之曰吾能治此命汲淨水洗病脚腐膿敗肉悉去之易水數器瘡上白筋數見搥以軟帛解包取藥末均糝瘡中惡水泉涌良久乃止明日淨洗如初日日皆然但見水漸淤肉漸生一月之後平復如舊主僧及合寺大喜欲謝以錢物僧云吾與山門結緣豈因以利却不受他日主僧具食延之謂曰山中蛇虺多被傷者時有之誠願得奇方以備急僧云和尙有命敢不從但此方來處絕妙不必廣傳香白芷爲末入鴨觜膽礬麝香各少許臨期以意斟酌之未幾僧去長老升座以此方徧告諸人

孫琳路鈴本殿前司健兒甯宗爲郡王病淋日夜凡三百起國醫罔措有與孫善者

薦其能光宗時在東宮亟使人召之至孫求二十錢買大蒜淡豉蒸餅三物爛研合和爲丸令以溫水下三十丸且曰今日進三服病當退三分之一明日再進如之三日則病除已而果然賞以千緡奏官右列或問其說孫曰小兒何緣有淋只是水道不通利蒜豉皆通利無他巧也張知閣久病瘧遇熱作時如火年餘骨立醫以爲虛餌之茸附熟愈甚招孫診視許謝五十萬孫笑曰但安樂時湖上作一會足矣命官局贖小柴胡湯三貼服之熟減十九又一服病脫然孫曰是名勞瘧熱從髓出又加剛劑剝損氣血安得不瘦蓋熟藥不一有去皮膚中熱者有去臟腑中熱者若髓熱非柴胡不可北方銀州柴胡只須一服南方力減於此故三服乃效今却可進滋補藥矣一少年子娶妻後得軟脚病疼特甚醫以爲脚氣孫聞之曰吾不必診視但買杜仲一味寸斷片析每一兩用半酒半水合一大盞煮六分頻服之三日能行又三日如未嘗病者孫曰府第寢處高明衣履燥潔無受濕之理特新娶色欲過度致然杜仲專治腰膝以酒行之則爲效易矣其伎大略如此奇驗

朱中直府判爲池之青陽簿老吏言紹興初有縣丞夫婦皆年三十而無子令吏輩

求嬰兒爲嗣不數日輒死又求之數年內凡失十餘子最後一子死棺殮就焚其本生父母來視之循其體兩股微熱復視之陰囊已破去雙腎矣哭告於官追丞家人効治具得其狀乃丞用道人授房中之術用嬰兒腎入藥僞爲求嗣實爲藥資案成丞死於獄不克正其罪

兀朮見一卒妻美殺其夫而納之寵嬖殊甚朮有所佩七首極利寢則枕之他日方寢此婦取七首將殺之朮覺驚問婦曰將殺汝朮曰何故曰我夫爲汝殺吾欲報仇朮默然久之曰吾不忍殺汝當爲汝別求夫乃盡集諸將使自擇婦指一人卽以嫁之丘宗卿同客談此曰此其所以爲兀朮也

京師士人出遊迫暮過人家缺墻似可越被酒試踰以入則一大園花木繁茂徑路交互不覺深入天漸暝望紅紗籠燭而來驚惶尋歸路迷不能識亟入道左小亭氈下有一穴試窺之先有壯士伏其中見人驚奔而去士人就隱焉已而燭漸近乃婦人十餘靚粧麗服俄趨亭上競舉氈見生驚曰又不是那一个又一婦熟視曰也得也得執其手以行生不敢問引入洞房曲室羣飲交戲五鼓乃散士人憊倦不能行

婦貯以巨篋昇而縋之墻外天將曉懼爲人所見強起扶持而歸他日跡其所遇乃蔡太師花圃也

今軍營中有天王堂按僧史天寶初西蕃寇安西奏乞援兵明皇詔不空三藏誦仁王護國經帝見神人帶甲荷戈在殿前不空云此毗沙門天王第二子獨健往救安西也後安西奏有神人長丈餘被金甲鼓角大鳴蕃寇奔潰斯須城上天王見形謹圖形上進因勅諸節鎮所在州府於城西北隅各立天王形像佛寺亦別院安置但不知何時流入軍營耳

趙德老常戲言明州有三賤燒底賤着底賤喫底賤或問其故曰燒底是燈草着底是草鞋喫底是鹽又云慈谿縣有三薦茶店湯瓶不曾薦客店床上無藁薦大街上好放薦皆可資笑

德安有人家土庫中被盜者絕無蹤跡一總轄謂其徒曰恐是市上弄胡孫者試往脅之不伏則執之又不伏則令唾掌中如其言其人良久覺無唾可吐色變具伏乃令胡孫由天窻中入取物或謂總轄何以知之曰吾亦不敢必但人之驚懼者必無

睡可吐姑以卜之幸而中耳又一總轄坐霸頭茶坊有賣熟水人持兩銀盃一客衣服濟然若巨商者行過就飲總轄遙見呼謂曰吾在此不得弄手段將執汝客慙悚而去人問其故曰此姦盜之魁也適飲水時以兩手捧盃蓋度其廣狹作僞者以易之耳吾既見安得不問韓王府中忽失銀器皿數事掌器婢叫呼爲賊傷手趙從善尹京命總轄往府中測視良久執一親僕訊之立伏歸白趙云適視婢瘡口在左手蓋與僕有私竊器與之以刃自傷僞稱有賊而此僕意思有異於衆以是得之建甯監作院鄭江三衢吏也以棘寺推司得官嘗云岳鵬舉初入獄欲坐以得督視所劄子令策應而三日不行爲違節制當行軍法何伯壽承奏命治其事乃謂岳曰相公但放心若相誤令某子孫皆無眼岳乃署竟坐死何由此得執政既而其家生子果皆青盲此事得於老吏

蔡元定字季通博學強記通術數遊朱晦翁門極喜之詹元善尤重之薦其傳康節之學命使定懋密院劄令赴行在蔡雖不應命人猶以聘君稱之晦翁以道學不容於時胡閔章疏併及蔡謂之妖人坐謫道州以死蔡善地理學每與鄉人卜葬改定

其間吉凶不能皆驗及貶有贈詩者曰掘盡人家好丘隴冤魂欲訴更無由先生若有堯夫術何不先言去道州

宋龐元英撰

談藪終

古今說海

清尊錄

說略十七 雜記十七

政和初冀州客次中或言某官之家有異事語未畢而某官者至因自言某妻生一男一女而死某既再娶矣一日亡妻忽空中有聲如小兒吹叫子狀三二日輒一至某問之曰君亦有形乎曰有之卽見形如平生敍舊感泣然近人輒引去常相距十許步因謂曰昔爲夫婦今忍不相親於是相與坐堂中某起執其手則堅冷如冰鐵妻勃然掣手去後五日乃復來慍曰前日遽驚我何耶某再三謝之竟不可近久之後妻忽夢其先祖云汝夫前妻爲怪乃陰府失收耳今已召捕且獲後數日果絕建炎初關陝交兵京西南路安撫使司檄諸郡凡民家畜三年以上糧者悉送官違者以乏軍興論金州石泉縣民楊廣貲鉅萬積粟支三十年因是悒悒得疾廣故豪橫兼并其鄉鄰甚患苦之既病篤絕惡見人雖妻子不得見自隙窺之則時摔所藉稻藁而食累日所食方數尺乃死斂畢棺中忽有聲若搥蹋者家人亟呼匠欲啟棺匠曰此非甦活殆必有怪勿啓其子不忍啓之則一驢躍出嘶鳴甚壯衣帽如蟬蛻

然家繫之隙屋中一日其子婦持草飼驢忽跳齧婦臂流血婦羸暴忿怒取抹草刀刺之立死廣妻遂訴縣稱婦殺翁縣遣修武郎王直臣往驗之備得其事

輿元民有得闌遺小兒者育以爲子數歲美姿首民夫婦計曰使女也教之歌舞獨不售數十萬錢邪婦曰固可詐爲也因納深屋中節其食飲膚髮腰步皆飾治之比年十二三嫣然美女子也攜至成都教以新聲又絕警慧益祕之不使人見人以爲奇貨里巷民求爲妻不可曰此女當歸之貴人於是女僧及貴游好事者踵門一覲面輒避去猶得錢數千謂之看錢久之有某通判者來成都一見心醉要其父必欲得之與直至七十萬錢乃售既成券喜甚置酒與客飲使女歌侑酒夜半客去擁而致之房男子也大驚遣人呼其父母則遁去不知蹤跡告官召捕之亦卒不獲時張子公尹蜀云

鄭州進士崔嗣復預貢入都距都城一舍宿僧寺法堂上方睡忽有聲叱之者嗣復驚起視之則一物如鶴色蒼黑目炯炯如燈鼓翅大呼甚厲嗣復皇恐避之廡下乃止明日語僧對曰素無此怪第旬日前有叢樞堂上者恐是耳嗣復至都下爲開寶

一僧言之僧曰藏經有之此新死屍氣所變號陰摩羅鬼此事王碩侍郎說

狄氏者家故貴以色名動京師所嫁亦貴家明艷絕世每燈夕及西池春遊都城士女讙集自諸王邸第及公侯戚里中貴人家霑幕車馬相屬雖歌姝舞姬皆飾璫翠佩珠犀覽鏡顧影人人自謂傾國及狄氏至靚粧却扇亭亭獨出雖平時妬悍自銜者皆羞服至相忿詆輒曰若美如狄夫人邪乃敢凌我其名動一時如此然狄氏資性貞淑遇族遊羣飲澹如也有滕生者因出游觀之駭慕喪魂魄歸悒悒不聊生訪狄氏所厚善者或曰尼慧澄與之習生過尼厚遺之日日往尼愧謝問故生曰極知不可幸萬分一耳不然且死尼曰試言之生以狄氏告尼笑曰大難大難此豈可動邪具道其決不可狀生曰然則有所好乎曰亦無有唯旬日前屬我求珠璣頗急生大喜曰可也卽索馬馳去俄懷大珠二囊示尼曰直二萬緡願以萬緡歸之尼曰其夫方使北豈能遽辦如許償邪生亟曰四五千緡不則千緡數百緡皆可又曰但可動不願一錢也尼乃持詣狄氏果大喜玩不已問須直幾何尼以萬緡告狄氏驚曰是纔半直爾然我未能辦奈何尼因屏人曰不必錢此一官欲祝事耳狄氏曰何事

曰雪失官耳夫人弟兄夫族皆可爲也狄曰持去我徐思之尼曰彼事急且投他人可復得邪姑留之明日來問報遂辭去且以告生生益厚餉之尼明日復往狄氏曰我爲營之良易尼曰事有難言者二萬緡物付一禿媪而客主不相問使彼何以爲信狄氏曰奈何尼曰夫人以設齋來院中使彼若邂逅者可乎狄氏頰面搖手曰不可尼慍曰非有他但欲言雪官事使彼無疑耳果不可亦不敢強也狄氏乃徐曰後二日我亡兄忌日可往然立語亟遣之尼曰固也尼歸及門生已先在詰之具道本末拜之曰儀秦之辨不加於此矣及期尼爲齋具而生匿小室中具酒殺俟之晡時狄氏嚴飾而至屏從者獨攜一小侍兒見尼曰其人來乎曰未也唄祝畢尼使童子主侍兒引狄氏至小室攀簾見生及飲具大驚欲避去生出拜狄氏答拜尼曰郎君欲以一卮爲夫人壽願勿辭生固頎秀狄氏頗心動睇而笑曰有事第言之尼固挽使坐生持酒勸之狄氏不能却爲醕卮卽自持酒酌生生因徙坐擁狄氏曰爲子且死不意果得子擁之卽幃中狄氏亦歡然恨相得之晚也比夜散去猶徘徊顧生掣其手曰非今日幾虛作一世人夜當與子會自是夜輒開垣門召生無闕夕所以奉

生者靡不至惟恐毫絲不當其意也數月狄氏夫歸生小人也陰計已得狄氏不能棄重賄伺其夫與客坐遣僕入白曰某官嘗以珠直二萬緡賣第中久未得直且訟於官夫諤胎入詰狄氏語塞曰然夫督取還之生得珠復遣尼謝狄氏我安得此貸於親戚以動子耳狄氏雖恚甚終不能忘生夫出輒召與通逾年夫覺閑之嚴狄氏以念生病死余在大學時親見

崇甯中有王生者貴家之子也隨計至都下嘗薄暮被酒至延秋坊過一小宅有女子甚美獨立於門徘徊徙倚若有所待者生方注目忽有騶騎呵衛而至下馬於此宅女子亦避去匆匆遂行初不暇問其何姓氏也抵夜歸復過其門則寂然無人聲循牆而東數十步有隙地丈餘蓋其宅後也忽自內擲一瓦出拾視之有字云夜於此相候生以牆上剝粉戲書瓦背云三更後宜出也復擲入焉因稍退十餘步伺之少頃一男子至周視地上無所見微歎而去既而三鼓月高霧合生亦倦睡欲歸矣忽墻門軋然而開一女子先出一老媪負笥從後生遽就之乃適所見立門首者熟視生愕然曰非也回顧媪媪亦曰非也將復入生挽而劫之曰汝爲女子而夜與人

期至此我執汝詣官醜聲一出辱汝門戶我邂逅遇汝亦有前緣不若從我去女泣而從之生攜歸逆旅匿小樓中女自言曹氏父早死獨有已一女母鍾愛之爲擇所歸女素悅姑之子某欲嫁之使乳媪達意於母母意以某無官弗從遂私約相奔墻下微歎而去者當是也生既南宮不利遷延數月無歸意其父使人詢之頗知有女子偕處大怒促生歸扁之別室女所齎甚厚大半爲生費所餘與媪坐食垂盡使人訪其母則以亡女故抑鬱而死久矣女不得已與媪謀下汴訪生所在時生侍父官閩中女至廣陵資盡不能進遂隸樂籍易姓名爲蘇媛生游四方亦不知女安否數年自浙中召赴闕過廣陵女以倡侍燕識生生亦訝其似女屢目之酒半女捧觴勸不覺兩淚墮酒中生悽然曰汝何以至此女以本末告淚隨語零生亦媿歎流涕不終席辭疾而起密召女納爲側室其後生子仕至尙書郎厯數郡生表弟臨淮李從爲余言

大桶張氏者以財雄長京師凡富人以錢委人權其子而取其半謂之行錢富人視行錢如部曲也或過行錢之家設特位置酒婦女出勸主人皆立侍富人遜謝強令

坐再三乃敢就位張氏子年少父母死主家事未娶因祠州西灌口神歸過其行錢孫助教家孫置酒數行其未嫁女出勸容色絕世張目之曰我欲娶爲婦孫皇恐不可且曰我公家奴也奴爲郎主丈人隣里笑怪張曰不然煩主少錢物耳豈敢相僕隸也張固豪侈奇衣飾卽取臂上古玉條脫與女且曰擇日納幣也飲罷去孫隣里交來賀曰有女爲百萬主母矣其後張別議婚孫念勢不敵不敢往問期而張亦恃醉戲言耳非實有意也逾年張婚他族而孫女不肯嫁其母曰張已娶矣女不對而私曰豈有信約如此而別娶乎其父乃復因張與妻祝神回并邀飲其家而使女窺之旣去曰汝見其有妻可嫁矣女語塞去房內蒙被臥俄頃卽死父母哀慟呼其鄰鄭三者告之使治喪具鄭以送喪爲業世所謂仵作行者也且曰小口死勿停喪卽日穴壁出瘞之告以致死之由鄭辦喪具見其臂有玉條脫心利之乃曰某一園在州西孫謝之曰良便且厚相酬號泣不忍祝急揮去卽與親族往送其殯而歸夜半月明鄭發棺欲取條脫女蹶然起顧見鄭曰我何故在此亦幼識鄭鄭以言恐曰汝之父母怒汝不肯嫁而念張氏辱其門戶使我生埋汝於此我實不忍乃私發棺而

汝果生女曰第送我還家鄭曰若歸必死我亦得罪矣女不得已鄭匿他處以爲妻完其殮而徙居州東鄭有母亦喜其子之有婦彼小人不暇究所從來也積數年每語及張氏猶忿恚欲往質問前約鄭每勸阻防閑之崇甯元年聖端太妃上仙鄭當從御饗至永安將行囑其母勿令婦出遊居一日鄭母晝睡孫出僦馬直詣張氏門語其僕曰孫氏第幾女欲見某人其僕往通張驚且怒謂僕戲已罵曰賤奴誰教汝如此對曰實有之乃與其僕俱往視焉孫氏望見張跳踉而前曳其衣且哭且罵其僕以婦女不敢往解張以爲鬼也驚走女持之益急乃擘其手破流血推仆地立死僦馬者恐累也往報鄭母母訴之有司因追鄭對獄具狀已而園陵復土鄭發冢罪該流會赦得原而張實推女而殺之雜死罪也雖奏獲貸猶杖脊竟憂畏死獄中時吳拭顧道尹京有其事云

建炎初劇盜張遇起江淮間所至嚙螫無噍類衆且數十萬其裨將馬吉者狀絕偉善用兵然頗仁慈每戒軍士勿妄殺人曰爲盜脫饑耳得食則已奈何廣殺凡虜獲士人及僧道輒條別善遇之有疾病視其起居飲食甚篤士卒得女以獻者置別室

訪其親戚還之無所歸者擇配嫁聘由是遇帳下譖之曰是收軍情者遇怒掃場欲斬之呼至數其罪嘻笑自若曰賊殺賊豈須有罪邪何云云如是我死固分耳既就地坐瞑目合爪視之死矣遇雖殘忍亦爲變色左右至流涕古稱得道至人以至佛菩薩多隱盜賊牢獄屠鈞中以其救人如吉殆是耶

富韓公謝事居洛一日邵康節來謁公已不通客惟戒門者曰邵先生來無早晚入報是日公適病足臥小室延康節至臥床前康節笑曰他客得至此邪公亦笑指康節所坐胡牀曰病中心怵怵雖兒子來立語遣去此一胡床惟待君耳康節顧左右曰更取一胡床來公問故答曰日正中當有一綠衣少年騎白馬候公公雖病強見之公薨後此人當秉史筆記公事公素敬康節神其言因戒閹人曰今日客至無貴賤立爲通既午果范祖禹夢得來遂延入問勞稠疊且曰老病卽死念平生碌碌無足言然羸懷朴忠他時筆削必累君願少留意夢得惶恐叵測避席謝後十餘年修裕陵實錄夢得竟爲修撰韓公傳此事尹侍郎說

雷申錫者江西人紹興中一舉中南省高第廷試前三日客死都下捷音與訃踵至

鄉里其妻日夜悲哭忽一夕夢申錫如平生自言我往爲大吏有功德於民故累世爲士大夫然嘗誤入死囚故地下罰我凡三世如意時暴死前一世仕久運蹇後忽以要官召纔入都門而卒今復如此凡兩世矣要更一世乃能以償宿譴耳其事可以有爲治獄者之戒

右清尊錄廉宣仲布所撰或謂陸公務觀所作非也蓋二公同時後人因誤指耳至大改元三月華石山人識

欽定四庫全書提要

睽車志六卷

宋郭彖撰彖字伯象和州人由進士歷官知興國軍是書皆紀鬼怪神異之事爲當時耳目所見聞者其名睽車志蓋取易睽卦上六載鬼一車之語也張端義貴耳集曰憲聖在南內愛神鬼幻誕等書郭彖睽車志始出洪景廬夷堅志繼之似此書嘗經進御矣宋史藝文志小說家類載有是書一卷陳振孫書錄解題作五卷而明商維濬刻入稗海者又作六卷參錯不一考夷堅志載趙三翁得道事有張儔朋父爲作傳郭彖伯象得其文載於睽車志末云云今勘檢此本惟張儔作張儔傳寫異文其在卷末則與洪說相應知猶舊本特後人屢有分析故卷目多寡互異耳書中所載多建炎紹興乾道淳熙閒事而汴京舊聞亦閒爲錄入各條之末悉分註某人所說蓋用杜

陽雜編之例其大旨亦主於闡明因果以資勸戒特摭拾既廣亦往往緣飾附會有乖事實如米芾本北宋名流而疑爲麟精程迥亦南渡宿儒多所著述而以爲其家奉玉真娘子由此致富張翥能斥姦平亂志操甚正身後尙廟食邵武而以爲挾嫌殺人白晝見鬼而卒皆灼然可知其妄其他亦多涉荒誕然小說家言自古如是不能盡繩以史傳取其勉人爲善之大旨可矣

古今說海

睽車志

說略十八 雜記十八

長安近城官道之側有大古冢以當行人常所往來故獨久存不毀建炎初寇亂有人發之得古銅鐘鼎之屬甚多驗款識皆三代物冢爲隧道窟室土堅如石周匝皆刻成人物侍衛之狀其冠服丈夫則幘頭婦人則假紵衣皆寬袖頗類今制而小異乃知數千載前冠服已嘗如此

龍舒人劉觀任平江許浦監稅其子堯舉字唐卿因就嘉禾流寓試僦舟以行舟人有女堯舉調之舟人防閒甚密無由得間既引試舟人以其重肩棘闥無已慮也日出市貿易而試題適唐卿私課既得意出院甚早比兩場皆然遂與舟女得諧私約觀夫婦一夕夢黃衣二人馳至報榜云郎君首薦觀前欲視其榜傍一人忽掣去云劉堯舉近作欺心事天符殿一舉矣覺言其夢而協頗驚異俄而拆卷堯舉以雜犯見黜主文皆歎惜其文既歸觀以夢語之且詰其近作何事匿不敢言次舉果首薦於舒然至今未第也

岳侯死後臨安西溪寨軍將子弟因請紫姑神而岳侯降之大書其名衆已驚愕請其花押則宛然平日眞迹也復書一絕云經略中原二十秋功多過少未全耐丹心似石今誰愬空有遊魂徧九州秦相聞而惡之擒治其徒流竄者數人有死者

常州一村媪老而盲家惟一子一婦婦一日方炊未熟而其子呼之田所婦囑姑爲畢其炊媪盲無所覩飯成捫器貯之誤得溺器婦歸不敢言先取其當中潔者食姑次以餉夫其親器臭惡者乃以自食良久天忽晝暝覲面不相覩其婦暗中若爲人攝去俄頃開明身乃在近舍林中懷掖間得小布囊貯米三四升適足供朝哺明日視囊米復如故寶之至今

治平丁未漳州地震裂長數十丈闊丈餘有狗自中出視其底皆林木枝葉蔚然

程迥者伊川之後紹興八年來居臨安之後洋街門臨通衢垂簾爲蔽一日有物如燕瞥然自外飛入往著於堂壁家人就視乃一美婦人僅長五六寸而形體皆具容服甚麗見人殊不驚小聲慙歷可辨自言我玉眞娘子也偶至此非爲君崇苟能事我亦甚善其家乃就壁爲小龕香火奉之頗能預言休咎皆驗好事者爭往求觀人

輸百錢乃爲啓龕至者絡繹小阜程氏矣如是期年忽復飛去不知所在

紹興初福建寇亂賊魁曰張義張萬全葉百三凶焰頗盛提刑李稷臣諭降之二張譖葉於稷臣且言初無降意將復爲變稷臣信之乃植大柱於通衢取葉以鐵索鎖縛於柱熾炭圍繞醢和五辛飲之備極楚毒稷臣躬臨視之葉大呼曰我已就降何罪至此體皆焦爛乃死自是稷臣每獨坐時見葉在側大惡之後三年稷臣徧體生瘡疱狀如火灼痛不可忍竟卒

宗左藏覲嘗言家故澤州有第宅園圃墻角有古冢因治地及之得一石誌題曰郡守李公之墓疊石爲藏棺中朽骨一具無他物而棺之側斲石爲乳婢抱哺一嬰兒不知其何爲也

向汲與其弟孿生狀貌酷相肖人不能辨一日汲自外歸弟婦以爲其夫也迎而呼之不應隨而詈之遂批其頰汲正色謂之曰我乃伯也婦惶愧而退汲自是更其衣冠以自別異

宣和間沂密有優人持二子號曰胡孩兒年各六七歲童首而長鬣所至觀者如堵

自云其婦孿生此二子生而有髭亦不知優人所自來後失所在尋而胡醜亂華蓋人妖也

逆亮末年自製尖鞞頭極長銳云便於鞮而足指所不及謂之不頭又爲短鞭僅存其半謂之沒下梢其後渝盟犯順果爲其下所戕死於江上

劉先生者河朔人年六十餘居衡嶽紫蓋峯下間出衡山縣市從人丐得錢則市鹽酪以歸盡則更出日攜一竹籃中貯大小筆椀帚麻拂數事遍遊諸寺廟拂拭神佛塑像鼻耳竅有塵土卽以筆撚出之率以爲常環百里人皆熟識之縣市一富人嘗贈一衲袍劉欣謝而去越數日見之則故褐如初問之云吾幾爲子所累吾常日出菴有門不掩旣歸就寢門亦不扃自得袍之後不衣而出則心繫念因市一鎖出則鎖之或衣以出夜歸則牢關以備盜數日營營不能自決今日偶衣至市忽自悟以一袍故使方寸如此是大可笑適遇一人過前卽脫與之吾心方坦然無復繫念嘻吾幾爲子所累矣嘗至上封歸路遇雨視途邊一家有穴遂入以避會昏暮因就寢夜將半睡覺雨止月明透穴照壙中厯厯可見巒螭甚光潔北壁惟白骨一具自頂

至足俱全餘無一物劉方起坐少近視之白骨倏然而起急前抱劉劉極力奮擊乃
零落墮地不復動矣劉出每與人談此異或曰此非怪也劉有氣壯盛足以翕附此
枯骨耳今兒童拔雞羽置之懷以手指上下引之隨應羽稍折斷卽不應亦此類也

宋陸偉撰

睽車志終

欽定四庫全書提要

藏一話腴四卷

宋陳郁撰郁字仲文號藏一臨川人理宗朝充緝熙殿應制又充東宮講堂掌書始末略見其子世崇隨隱漫錄中世崇載度宗嘗贊郁像有文窺西漢詩到盛唐之語寵獎甚至岳珂序稱其閉戶終日窮討編籍足不蹈毀譽之域身不登權勢之門然劉堦隱居通議有度宗御札跋惜其下訪陳郁父子之卑陋

語詳隱居通議條下

又周密武林舊事

載諸色伎藝人姓名所列御前應制者八人姜特立爲首而郁居第四則亦特立之流惟特立名列宋史佞倖傳而郁不與焉似乎未可同日語耳是書分甲乙二集又各分上下卷多記南北宋雜事間及詩話亦或自抒議論珂序又稱其出入經史研究本末具有法度而風月夢怪嘲戲譌誕淫麗氣習淨洗無遺今觀所載如謂周子游廬

山大林寺詩水色含雲白禽聲應谷清一聯前句是明後句是誠附會迂謬殆可笑矐惠洪解杜甫老妻畫紙爲碁局稚子敲鍼作釣鉤一聯以老妻比臣以稚子比君固爲妄誕郁必謂上句比君子之直道事君下句比小人之以直爲曲亦穿鑿無理所錄諸詩亦皆不工其持論如謂孔子不當作世家豫讓不當入刺客傳斥史記不醕頗涉庸膚謂李虛中以年月日時推命而不知韓愈作虛中墓誌其推命實不用時尤失考證然所記遺聞多資勸戒亦未嘗無一節之可取焉

古今說海

話腴

說略十九 雜記十九

藝祖微時日詩云欲出未出光辣撻千山萬山如火發須臾走向天上來趕卻殘星趕却月國史潤飾之云未離海嶠千山黑才到天心萬國明文氣卑弱不如元作眞西山鎮溫陵有海寇猖獗令正將王大受將卒五百擒獲其趙某等三渠魁及從賊百餘輩大受歸傷重而沒趙宗子也始皆疑西山未易處閱數日獄成西山引諸囚入教場縛二渠魁於中掩其心令諸軍射箭如蝟而賊未死或斬或槌次第而畢惟置趙於傍觀之次陵遲二渠魁且以心肝祭大受訖補其二子以指使又配其二女以良壻賞罰兼行士民驚服皆以爲趙可生也事畢西山呼趙問之趙稱宗室不絕西山曰宗室爲賊首則非宗室矣宜正以王法決交脊二百而死

南康縣外二十里許有劉氏女少而慧父母初以許蔡無故絕蔡而許吳吳亡又以許蔡女曰吾一身而三許人何顏登人門戶投潭水而死鄉社立賢女祠今存焉菱芡皆水物也胡爲菱寒而芡暖蓋菱花開必背日芡花開必向日故也桃杏雙仁

者必殺人其花本五出有六出必雙仁而殺人矣反常故也木實之蠹者必不沙爛沙爛者必不蠹而能浮若不浮者亦殺人蓋既沙爛則不能蘊畜而生蟲瓜至甘而不蠹者以其沙也有物有則若可窮矣

馬友犯長沙向薊林捍之不敌而潰道遇友別將方舟而來家人輩惶懼知弗脫矣賊指求薊林愛妾妾聞命無懼色自語賊曰必欲我當以車馬來賊許之妾卽盛飾以待家人駭之然猶謂其往可以紓難頃刻肩輿至卽奮而登既過河望賊舟不甚相遠妾忽語輿卒欲少止羣卒乃弛轎妾一躍入水急援之已絕矣賊相顧不發薊林亦悠然而去

岳鄂王飛謝收復河南赦及罷兵表略曰夷狄不情犬羊無信莫守金石之約難充溪壑之求暫圖安而解倒垂猶云可也欲長慮而尊中國豈其然乎又曰身居將闔功無補於涓埃口誦詔書面有慚於軍旅又曰尙作聰明而過慮徒懷猶豫以致疑蓋無事而請和者謀恐卑辭而厚幣者進願定規於至勝期收地於兩河唾手幽燕終欲復讐而報國誓心天地當令稽首以稱藩未幾虜渝盟河南復陷後六十年得

虜之南遷錄見當時諸酋議論銳意爲取江南之計歸三京以誘吾歸兵於平地吾保河南則江必虛若吾不守河南則是彼嘗見歸吾自棄置遺民當自歸曲於吾矣虜謀若此鄂武穆之料敵信不妄云

徽廟一日幸來夫人閣就灑翰於小白團扇書七言十四字而天思稍倦顧在側璫云汝有能吟之客可令續之乃薦鄰里太學生旣宣入內侍省恭讀宸製不知指意乞爲取旨或續句呈或就書扇左上曰朝來不喜餐必惡阻也當以此爲詞以續於扇續進上大喜會將策士生於未奏名徑使造庭賜以第馬上御詩曰選飯朝來不喜餐御廚空費八珍盤生續曰人間有味俱嘗遍只許江梅一點酸

唐李涉過皖口之西遇大艦遏其征數十人持兵仗問是何人從者曰李涉博士船也其豪首曰若是李涉聞詩名已久但希一篇金帛非敢取也李乃贈一絕云暮雨蕭蕭江上村綠林豪客夜知聞相逢不用相迴避世上於今半是君

眞廟朝寢殿側有古檜秀茂不羣名御愛檜然橫礙殿簷眞皇意欲去之一夕風雷轉摺其枝時以爲瑞

諸葛武侯薦馬超於先主關羽恐其出已右移書問之武侯曰可與益德並驅馳衡然非髯將軍比也羽聞而喜余謂武侯此語既不掩超之美又有以結羽之心深沉大略可涯涘邪當其兵數敗衄時下教曰今非將不善兵不衆而敗蓋亮未聞過耳諸君攻亮之過則兵決可勝夫人有失誰不懷忌而武侯獨願聞其過豈不誠大丈夫哉

端平甲午七月八日我師尅復彭城麾下洪福得亡金人手抄詩余於其中得一二篇迺知河朔幽燕渾厚之氣至此散矣因錄於後李國棟夏卿感懷云東金西木兩睽違由此生男不足依但願相忘不相顧莫言誰是復誰非幾家能用三牲養千古空傳五綵衣一把殘骸著無處不歸溝壑欲誰歸自注云瑤瑤子曰東金西木定生五逆之男僕命庚申日甲申時政爲此爾梁仲經哀遼東一首云守臣肉貪頭如雪夜半羣胡登雉堞十萬人家靡子遺馬蹄殷染衣冠血珠玉盈車宮殿焚娼娼少女嬪羶葦路逢人語辛酸事骨痛心摧不忍聞我今來作遼陽客入境臨風弔冤魄遼水無聲遼地空蕭蕭暮雨天垂泣青綾慣睡直承明徧褻縵胡不稱情見說豺狼當

路立自憐烏鵲遶枝驚安邊計策無何有憂國形骸太瘦生何日凱還思舊職不才
猶可薦咸英史舜元哀王且一首云八月風高胡馬壯胡兒彎弓向南望鐵門不守
犯孤城失我堂堂仁勇將將軍之起本儒臣緯武經文才過人墨磨盾鼻掃千字箭
射戟牙驚六軍憶昔同時初上疏明日東華聽宣諭我從金轂東巡邏公總干戈練
征戍三月和兵好始修胡兵一夜襲通州練衣出郊雖頻戰氈帳沿河未肯休將軍
盡出兵如水燒胡之車破胡壘倒戈棄甲十萬人亂轍靡旗三百里金甲煌煌金印
光詔書命我守昆陽然知人有百夫勇可奈倉無一日糧叛臣暗作開門策一虎翻
爲羣犬獲胸中氣憤爆雷聲領下鬚張蝟毛磔將軍雖死尙如生萬里遙傳忠義名
昔聞陝右段忠烈今見常山顏杲卿棟朽榱崩人短氣平生况切同年義試歌慷慨
一篇詞定灑英雄千古淚王且者昆陽守王子明也余於感懷篇著其無父子之道
亡國之本也於哀遼東哀王且篇著其敗亡之迹以見天道之好還也
明之象山士子史本有木犀忽變紅色異香用接本獻闕下高廟雅愛之畫爲扇面
仍製詩以賜從臣云月宮移就日宮栽引得輕紅入面來好向煙霄承雨露丹心一

點爲君開又云秋入幽巖桂影團香深粟粟照林丹應隨王母瑤池宴染得朝霞下
廣寒自是四方爭傳其本歲接數百史氏由此昌焉一卉之微香色稍異能動至尊
入品題且昌其主可以人而不如木乎

世論多以阮籍爲放曠不羈之士守禮法者羞言之蓋以迹而不以心也余見其沉
酣不理若與世違然觀漢楚戰場則曰時無英雄使稚子成名豈忘慮於世變哉口
不臧否然待人以青白眼豈無意於人物哉居喪飲酒食肉然慟哭則嘔血數斗豈
不情於哀戚哉當其王室不競強臣擅威戮大臣如刺犬豕故張華衛瓘以清直死
嵇康以高簡死王衍以清談死陸機陸雲以俊才死至文帝將求婚鍾會欲詢以時
事而致之罪而籍終皆以沉湎避其察微見遠寄託保身非高出數子之上其能脫
屣於禍穿哉吁善觀人者當考其迹而逆察其心乃可也

曲帥端統兵日有叔父必欲居將列以功名自見力止之不聽遂以偏將出戰後竟
敗歸端勞傷撫殘之餘軍正以將叔敗告謂當伏誅不免委諸法旣誅矣端乃成服
發喪其祭文曰嗚呼斬叔者涇原統制祭叔者姪兒曲端尙亨士莫不畏服又方秦

丞相殺諸公時趙公鼎薨於謫所有名士大夫遣祭於道間秦聞而索之將羅織以罪而其文止叙年月日具位姓名致祭於某官之靈嗚呼哀哉尙饗而已秦竟不得而罪焉

建炎樞密聶昌臨川人也上庠釋褐出身元名山御筆改今名朝廷令往河北割地粘罕令撤傘而後見昌云彼此皆王臣也平交耳安有撤傘之禮竟不從粘罕亦莫之屈當時河北百姓不肯割土昌因與虜爭死之謚榮愍

明之慈谿縣西北有慶安寺寺前有古松夾道綿亘數里望之如蒼雲其一最巨而奇蜿蜒若龍飛偃如蓋臨池之上寺後有泉出於深谷僧以巨竹連筒引行數里支分於松下石池溢入於溪舒龍圖亶有詩云門前屏障遶潺湲付與林僧夜定還松蓋作雲遮十里竹龍行雨出千山白公香火蓮開後謝氏池塘草夢間我亦鳳凰臺上客圖閒却笑未能閒其後邑長沈時升有造舟之役睥睨茲松將斤焉里士馮文學輒作詩以遺沈賴以不伐松因詩而壽焉詩曰寒松一榦老蒼蒼古寺門前歲月長匠伯偶圖舟楫利禪翁方患斧斤傷得全此日同齊口勿翦他年比召棠可但與

君期久遠相將俱列大夫行

寫照非畫物比蓋寫形不難寫心惟難也夫帝堯秀眉魯僖司馬亦秀眉舜重瞳項羽朱友敬亦重瞳沛公龍顏嵇叔夜亦龍顏世祖日角唐高祖亦日角文皇鳳姿李相國亦鳳姿尼父如蒙魑陽虎亦如蒙魑竇將軍鳶肩駱賓王亦鳶肩揚食我熊虎之狀班定遠乃虎頭司馬懿狼顧周嵩乃狼抗若此者寫之似足矣故曰寫形不難夫寫屈原之形而肖矣儻筆無行吟澤畔懷忠不平之意亦非靈均寫少陵之貌而是矣儻不能筆其風騷沖澹之趣忠義傑特之氣峻潔葆麗之姿奇僻瞻博之學離寓放曠之懷亦非浣花翁蓋寫其形必傳其神傳其神必寫其心否則君子小人貌同心異貴賤忠惡奚自而別形雖似何益故曰寫心惟難

臨川藏一居士陳郁仲文撰

話腴終

欽定四庫全書提要

朝野僉載六卷

舊本題唐張鷟撰鷟有龍筋鳳髓判己著錄此書新唐書藝文志作三十卷宋史藝文志作僉載二十卷又僉載補遺三卷文獻通考則但有僉載補遺三卷此本六卷參考諸書皆不合晁公武讀書志又謂其分三十五門而今本乃逐條聯綴不分門目亦與晁氏所紀不同考莫休符桂林風土記載鷟在開元中姚崇誣其奉使江南受遺賜死其子上表請代減死流嶺南數年起爲長史而卒計其時尚在天寶之前而書中有寶歷元年資陽石走事寶歷乃敬宗年號又有孟宏微對宣宗事時代皆不相及案尤袤遂初堂書目亦分朝野僉載及僉載補遺爲二書疑僉載乃鷟所作補遺則爲後人附益凡闕入中唐後事者皆應爲補遺之文而陳振孫所謂書本三十卷此其

節略者當卽此本蓋嘗經宋人摘錄合僉載補遺爲一刪併門類已非原書又不知何時析三卷爲六卷也其書皆紀唐代故事而於諧矇荒怪纖悉臚載未免失於纖碎故洪邁容齋隨筆譏其記事瑣屑擿裂且多媠語然耳目所接可據者多故司馬光作通鑑亦引用之兼收博採固未嘗無裨於見聞也

古今說海

朝野僉載

說略二十 雜記二十

周洛州司倉嚴昇期攝侍御史於江南道巡察性嗜水犢肉所至州縣烹宰極多小事大事入金則弭凡到處金銀爲之踊貴故江南人號爲金牛御史

周春官尙書闈知微和默啜司賓丞田歸道爲副至牙帳下知微舞蹈宛轉抱默啜靴鼻而吮之歸道長揖不拜默啜大怒倒懸之經一宿乃放及歸與知微爭於殿庭言默啜不必和知微堅執以爲和默啜果反陷趙定知微誅九族拜歸道夏官侍郎右拾遺口良弼使入匈奴坐帳下以不潔食之良弼食盡一盤放歸朝廷恥之

周文昌左丞孫彥高無他識用性頑鈍出爲定州刺史歲餘默啜賊至圍其郛彥高卻鎖宅門不敢詣廳事文案須徵發者於小窻內按入賊旣乘城四入彥高乃謂奴曰牢關門戶莫與鑰匙其愚怯皆此類俄而陷沒刺史之宅先殲焉

周契丹賊孫萬榮之寇幽州河內王武懿宗爲元帥引兵至趙州聞賊數千騎從北來乃棄兵甲南走邢州賊退方更向前軍回至都置酒會郎中於御前嘲懿宗曰長

弓短度箭蜀馬臨堦驅去賊七百里隈墻獨自戰甲仗總拋卻騎猪正南竄上曰懿宗有馬何因騎猪對曰騎猪者夾豕走也上大笑懿宗貌短醜故曰長弓短度箭周左領軍權龍褒將軍不識忌日問府史曰何名私忌對曰父母亡日請假獨坐房中不出褒至忌日於房中靜坐有青狗突入房中褒大怒衝破我忌更陳牒改明朝好作忌日談者笑之

周推事索元禮時人號爲索使訊囚作鐵籠頭聲呼角切

其頭仍加楔焉多至腦裂髓

出亦爲鳳曬翅等以椽關手足而轉之並研骨至碎亦懸囚於梁下以石緹頭其酷法如此元禮故胡人薛師假父後坐贓賄流死嶺南

唐監察御史李全交專以羅織爲業臺中號爲人頭羅刹殿中號爲鬼面夜叉訊囚引枷柄向前名爲驢駒拔檟縛枷頭著樹名曰犢子懸車兩手捧枷累磚於上號爲仙人獻果立高木之上枷向後拗之名玉女登梯

隋末深州諸葛昂性豪俠渤海高瓚聞而造之爲設雞肫而已瓚小其用明日大設屈昂數十人烹猪羊等長八尺薄餅闊丈餘裹燄麤如庭柱盤作酒盃行巡自爲金

剛舞以送之昂至後日屈瓚屈客數百人大設車行酒馬行炙挫確斬膾礪齏蒜齏唱夜叉歌師子舞瓚明日復烹一雙子十餘歲呈其頭顱手足座客皆喉而吐之昂後日報設先令要妾行酒妾無故笑昂叱下須臾蒸此妾坐銀盤仍飾以脂粉衣以錦繡遂擘骸肉以啖瓚諸人皆掩目昂於妳房間撮肥肉食之盡飽而止瓚羞之夜遁而去昂富後遭離亂狂賊來求金寶無可給縛於椽上炙殺之

唐益州新昌縣令夏侯彪之初下車問里正曰雞子一錢幾顆曰三顆彪之乃遣取十千錢令買三萬顆謂里正曰吾未要且寄雞母抱之遂成三萬頭雞經數月長成令吏與我賣卻一雞三十文半年之間成九十萬又問竹筍一錢幾莖曰一錢五莖又取十千錢付之買得五萬莖又謂未須且林中養之至秋成五萬莖竹令賣一莖十錢遂至五十萬其貪猥不道皆此類

唐滕王極淫諸官妻美無不嘗徧詐言妃喚卽行無禮時典籤崔簡妻鄭氏初到王遣喚欲不去懼王之威去則被辱鄭曰昔惑懷之妃不受賊胡之逼當今清泰敢行此事邪遂入王中門外小閣王在其中鄭入欲逼之鄭大叫左右曰王也鄭曰大王

豈作如是必家奴耳取一隻履擊王頭破抓面流血妃聞而出鄭氏乃得還王大慙旬日不視事簡每日參候不敢離門後王衙坐簡向前謝過王慙卻入月餘日乃出諸官之妻曾被王喚入者莫不羞之其壻問之無辭以對

唐杭州刺史裴有做疾甚令錢唐縣主簿夏榮看之榮曰使君百無一慮夫人早須崇福以禳之崔夫人曰禳須何物榮曰使君娶二姬以厭之出三年則厄過矣夫人怒曰此獠狂語兒在身無病榮退曰夫人不信榮不敢言使君合有三婦若不更娶於夫人不祥矣夫人曰乍可死此事不相當也其年夫人暴亡做更娶二姬

周大足年中泰州鄭家莊有一兒郎年二十餘日晏於驛路上見一青衣女子獨行姿容姝麗郎君屈就莊宿將衣被同寢至曉門久不開呼之不應於窻中窺之惟有腦骨頭顱在餘並食訖家人破戶入一物不見於梁上暗處有一大鳥衝門去或云羅刹魅也

唐柴駙馬紹之弟有材力輕趨迅捷踊身以上挺然若飛十餘步乃止嘗著吉莫靴上磚城直至女牆手無拔引又以足指緣佛殿柱至簷頭捻椽覆上越百尺樓閣了

無障礙文武聖睿皇帝奇之曰此人不可以處京邑出爲外官時人號爲壁飛

唐垂拱四年安撫大使狄仁傑檄告西楚霸王項君將校等略曰鴻名不可以謬假神器不可以力爭應天者膺樂推之名背時者非見幾之主自祖龍御宇橫噬諸侯任趙高以當軸棄蒙恬而齒劍沙丘作禍於前望夷覆滅於後七廟墮圯萬姓屠原

鳥思靜於飛

陳作塵

魚豈安於沸水赫矣皇漢受命玄穹膺赤帝之禎符常素靈之缺

運俯張地紐彰鳳舉之符仰緝天綱鬱龍興之兆而君潛遊澤國嘯聚水鄉矜扛鼎之雄逞拔山之力莫則天符之所會不知歷數之有歸遂奮關中之翼竟垂垓下之翅蓋實由於人事焉爲屬於天亡雖驅百萬之兵終棄八千之子以爲殷鑒豈不惜哉固當匿魄東峯收魂北極豈合虛承廟食廣費牲牢仁傑受命方隅循革攸寄今遣焚燎祠宇削平臺室使蕙檄銷盡羽帳隨煙君宜速遷勿爲人患檄到如律令遂除項羽廟餘神並盡惟會稽禹廟存焉

周則天時謠言曰張公喫酒李公醉張公者易之兄弟也李公者言王室也

周杭州臨安尉薛震好食人肉有債主及奴詣臨安止於客舍飲之醉並殺之水銀

和煎并骨銷盡後又欲食其婦婦知之踰牆而遁以告縣縣令詰之具得其情申州錄事奏奉勅杖一百而死

周舒州刺史張懷肅好服人精唐左司郎中任正名亦有此病

周郎中裴珪妻趙氏有美色曾就張瓌藏卜年命瓌藏曰夫人目長而慢准相書猪視者淫婦人目有四白五夫守宅夫人終以姦廢宜慎之趙笑而去後果與合宮尉盧崇道姦沒入掖庭

唐宜城公主駙馬裴巽有外寵一人公主遣人執之截其耳鼻剝其陰皮附駙馬面上并截其髮令廳上判事集僚吏共觀之駙馬公主一時皆被奏降公主爲郡主駙馬左遷也

唐開元二年衡州五月頻有火災其時人盡皆見物大如甕赤如燈籠所指之處尋而火起百姓咸謂之火殃

周永昌中涪州多虎暴有一獸似虎而絕大逐一虎噬殺之錄奏檢瑞應圖乃酋耳也不食生物有虎則殺之

漢發兵用銅虎符及唐初爲銀兔符以兔子爲符瑞故也又以鯉魚爲符瑞爲銅魚符以佩之至僞周武姓也玄武龜也又以銅爲龜符

柳州古桂陽郡也有曹泰年八十五偶少妻生子名曰曾日中無影焉年七十方卒親見其孫子具說道士曹體一卽其從孫姪云的不虛故知邴吉驗影不虛也

唐張鷟撰

朝野僉載終

宣統元年七月出版

不許複製

藏版者

集成圖書公司

印刷所

上海南京路
集成圖書公司

總發行所

上海棋盤街
集成圖書公司

分發行所

北京 天津 漢口 廣東 山西
集成圖書公司

經售處

各埠大書坊

古今說海全部計十二冊
定價大洋四元正

金 山 高 氏
須 野 園 書

上海图书馆藏书



A541 212 0017 0134B

